

**PŌLU 'LETRE PLE MI 'LA
 □KPAĀ KORENTI -WA 'E TA
 ZESU 'YI MU 'E NI
 Pōlu 'letre ple mi 'la □kpaā
 Korenti -wa 'e ta Zesu 'yi mu
 'e ni 'bhe ḡblo**

Pōlu -yaa' letre □lwa mi 'e 'kpale- Korenti -wa 'e ta Zesu 'yi mu -ledo' 'e ni, 'kee- Timote 'winbole 'kaa 'bhe ge -o taglin-, 'kooko- 'ke -woo 'taawo zii' ḡḡḡ- 'la ḡḡḡḡ- 'yee- Pōlu -o -daanna -za mu 'la 'le 'mu ta -e 'bhe dō.

Timote dale blaān Korenti -wa 'e ta, -e Zesu 'yi mu 'e ta jan mu 'la □klaa Pōlu 'kōō, 'mu 'laa -yaa lele. 'Bhela- -zayile, 'ke 'yee- Pōlu 'gbu gele- -o ba ye, 'bhē- 'ke -ya 'kpankpanyanle -o ma dōō -woo 'taawogbeya 'e mabōō. -E bhōlawoa -o ba, 'ke -o do -yraladōle -a ma 'bhe 'taawogbeya 'e ma, 'bhē- 'bhe 'a wleyisriwoa (Korenti Ple mi 2.5-11; 7.12). 'Bhe klēle 'tē, 'ke 'yee- Pōlu 'niinale blaale- -a -zanta' Efēzi -wa 'e ta, 'bhē- 'kee- wisile 'ebebele Korenti Zesu 'yi mu -ledo' 'e 'taawogbeya 'e ma. 'Bhe 'yi bhe 'tē, 'kee- 'letre 'bhēke do 'kpale -o ni -ḡblaān 'kla zayi' -o -yi (Korenti Ple mi 2.4; 7.8). 'Bhē- 'taalēyi, -e Titi -la winbwa-dōō 'bhe ge 'bhe 'letre 'e 'le -o ni. 'Bhe 'letre 'e □nia zi 'lii. 'Bhe blaān, 'ke Pōlu gele- Masedwani 'klēn 'e 'yi, 'kee- Titi 'la 'winbwa- Korenti -wa 'e ta 'bhe 'yele 'bhe □nōō ye. 'Bhē- 'ke 'yee Titi 'woo- Korenti Zesu 'yi mu 'e ta jan -nrāle' wole- Pōlu ni

doo -wa 'wojan- mu 'ε □maa, 'bhe 'pegee -woo 'taawogbeya 'ε maboola. Pɔlu 'bhe 'male- 'te, 'kee- 'letre 'bhεeke do 'kpale 'woo- Korenti Zesu 'yi mu 'ε ni, -koo' 'bhεε- sii -zon doo: «Korenti mu a 'Letre Ple mi». 'Bhe 'letre 'lεε- 'yi, Pɔlu 'a 'yipia□ -o ni doo 'yele- 'woo- Korenti Zesu mu -lεdo' 'ε □klaa 'eke- ba, 'bhεε- -yoo -liala doo -woo 'eke- 'yima', -o -za 'so 'eke- ni, 'bhεε- -o 'kpale- kle do ma. Pɔlu 'yee- 'letre ple mi 'lεε- 'yicienna -le yaga.

-A -le □lwa mi 'ε 'yi (Korenti Ple mi 1-7), -e -Waanbhaa' 'pubwa- 'bhe 'fuu 'la -dwa -a ta -yaa' -yrenbhle' bhla 'ε zi 'bhe -zayi', 'bhe 'pegee -za 'la 'yaa- 'yee- Pɔlu 'gbu 'pegee Korenti Zesu 'yi mu 'ε 'plen- 'bhe 'yanle- 'ε -zayi'. -E ye yεke- 'la □woa -o ba ye, 'bhe 'pegee -o -za so -a ni gɔnε- 'la gbεen-, -e 'bhe -dwa -o 'kpee.

-A -le ple mi 'ε 'yi (Korenti Ple mi 8-9), Korenti Zesu 'yi mu 'ε nu -goli' 'la 'kpale- 'eke- ta, 'bhεε- -o 'bhe kpa Zeruzalemu Zesu 'yi mu 'ε ni, -e bhe -jan 'ε □woa -o ni. 'Bhela- -zayile, -yoo -liala doo -woo gbε ta kle taataa -goli' 'nale- ma.

-A -le yaga mi 'ε 'yi (Korenti Ple mi 10-13), bhla ma -Waanbhaa' 'lela janwo mu 'la -woo -la 'zi 'yee- Pɔlu ta, -yoo -a 'gbu ta janwo 'zi 'mu ni.

'Yee- 'letre 'lεε- 'leyanyre 'ε □nɔɔ, Pɔlu 'a 'srawoa- Korenti Zesu 'yi mu 'ε ma, 'bhεε- -yoo zan gelawole -o ba ye bhe, -e 'bhe -janwoa -o ni 'ezin-.

'Letre 'ε zisanyre

¹ 'Mi Pɔlu 'la -e □swa -Waanbhaa' ni 'ke -yoo 'η makun, 'bhεε- -yoo 'η kle Zesu Krisi a winbowo mi 'le; 'mi 'pegee -koo' nεεnε- Timote -le 'letre

'lɛɛ- 'kpa zii' 'ka ni. Zesu 'yi mu -lɛdo' 'la -woo Korɛnti -wa 'ɛ ta, 'bhɛ 'pegee -yaa' mɛɛ 'wɛŋ mu 'la 'kɛn -o Akayi 'klɛn 'ɛ 'yi, 'woo- 'yee- 'lɛtrɛ 'lɛɛ- 'kpa zii' 'mu -la 'kɛn ni.

² Bhaa -koo' Dɛ -Waanbhaa' 'pegee Mɛɛzan Zesu Krisi -li 'ka ma, 'bhɛɛ- -o yilabla na 'ka ni.

Pɔlu -o -Waanbhaa' 'pubɔ- 'zi

³ -Koo' -Waanbhaa' 'tɔbhɔ, 'yele- -kooa' Mɛɛzan Zesu Krisi a -Waanbhaa' 'le 'bhɛ 'pegee -a Dɛ 'le. 'Bhɛɛ- 'yele- -koo' Dɛ 'la -koo' 'yɛnkla- a ma 'bhɛ 'le, 'bhɛ 'pegee- Waanbhaa' 'la fangandɔ -koo ta 'yele- 'bhɛ 'le.

⁴ 'Yee- -Waanbhaa' zruwla -koo' 'kpee -kooa' -yɛn mu 'ɛ 'kɛn 'yi. -E 'bhɛ klɛ -koo' mu ni, 'kooko- -koo' mu sɔ zruwlalɛ mɛɛ 'la zan mu -o -yɛn -gloɔn 'ɛ 'kɛn 'bhle zii' 'mu 'kpee 'ezin-.

⁵ Wlan 'ɛ ni, Krisi -yɛn mu □bhla -koo' mu ni 'ebebele gɔnɛ- 'la gbɛɛn-, -Waanbhaa' 'duŋ- nu zruwlalɛ -koo' mu 'kpee 'egbɛnɛle 'bhɛɛ- klegbɛya do 'ɛ 'yi Krisi 'srɔyi.

⁶ 'Ke 'woo- -yɛn mu bhle 'zi, 'bhɛ -yɛn mu 'ɛ 'mu -o 'ke zruwlapɛ 'le 'ka mu 'kpee, 'bhɛ 'pegee 'ka mu go pɛ 'le -za 'yi. 'Ke -Waanbhaa' zruwlaa- 'o mɔɔ 'kpee, -e 'bhɛ klɛ 'zi, 'kooko- 'o mɔɔ sɔ zruwlalɛ 'ka mu 'kpee, 'bhɛɛ- 'ka mu sɔ 'o ta -yɛn mu 'ɛ yɛkɛ- 'yikunle 'ka zrubakpaale 'le.

⁷ 'Bhɛ ya 'ɛ 'yi, 'o 'kpale- 'la -yoo 'ka 'yi, 'bhɛ -o 'egloole. -Amasrɔyi 'wa 'yaango- 'bhii- 'ke 'ka 'waa- -yɛn mu 'ɛ 'ke □bhla, -Waanbhaa' nu 'bhɛ yɛkɛ- zruwlalɛ 'ka 'kpee 'bhɛ klegbɛya do 'ɛ 'yi 'ezin-.

⁸ 'Ŋ nɛɛɛ- mu, -o -yɛn -glooɔn mu 'la □bhla *Azi 'kleɛn 'ɛ 'yi, 'woo- -a zi 'bhii- 'ka 'mu do: -o -yɛn -kpaɔ 'o ta 'eyoole 'kee- kan -a -dan' ta, 'fo 'o 'yri 'laa -yaa -li -a ta 'bhii- 'o nu boɓɛ 'o 'yɛ ma.

⁹ 'O mɔɔ 'gbu 'kpee ma 'o ga bhla 'ɛ □bhwa. 'Bhɛ 'kla- 'bhɛ gbɛɛn- bhɛ, 'kooko- 'waa 'o kpa 'ezin- -li 'o 'gbu 'yi, 'duɲ- 'kooko- 'woo 'kpa -Waanbhaa' 'la 'bhɛ gbaa mu bwe gale ba 'bhɛ do -kplɛn -la -yi.

¹⁰ 'Yee- -Waanbhaa' -le 'o -gwa 'bhɛ ga -glooɔn 'ɛ 'yi; 'bhɛɛ- 'yele- nu 'o goɓɛ 'ezin- 'bhɛ 'yansi -za -glooɔn mu 'ɛ 'yi. Wlan 'gbu 'ɛ ni, 'o 'yri -o -a ta 'bhii- -e nu 'o goɓɛ 'ezin- 'bhɛ 'yansi -za -glooɔn mu 'ɛ 'yi.

¹¹ 'Ka mu 'gbu -o 'ka 'seriwo zii' 'ezin- 'waa- -za ma. 'Bhɛ klegbɛya 'ɛ 'yi, mɛɛ -bebe -o 'seri mu 'la kle 'zi 'o ba zayi', -Waanbhaa' nu 'mu 'lɛkunɓɛ, 'kooko- 'kee- -yaa' -lileya 'ɛ -zɔɔna 'o ni, mɛɛ -bebe mu nu a 'pubɔɓɛ 'bhɛ -zayi' 'waa- -za ma.

POLU 'PEGEE KORENTI ZESU 'YI MU 'ɛ 'PLENZA- MU

Polu -o -yaa' 'taa 'bhɛɛke ta geza wo 'zi

¹² Wlan 'ɛ ni, 'woo baa -za 'la 'yi 'bhɛ -le -gɛ: 'o 'gbu zru 'ɛ 'bhɛ -o -a pe 'zi 'o ni doɔ 'o 'taawoa□ 'drunyan 'lɛɛ- 'yi, 'bhɛ 'pegee 'o 'taawoa□ 'ka mu 'gbu ba -yɛ ta, 'o 'kpee 'fleele- 'pegee 'o zru do 'le; 'bhɛ 'kpee 'fleeleya 'ɛ 'pegee 'o zru kleɓɓɛ do 'ɛ 'mu 'yaa- da 'zi -Waanbhaa' -la ba. 'Duɲ- 'o 'bhɛ □kla -Waanbhaa' -lilawoa 'o ma 'bhɛɛ- 'sɔyi, 'bhɛ 'laa daɓɓɛ bhaaplɛɲ a pɛ -zadɔleya ba.

¹³ Wlan 'gbu 'ɛ ni, 'waa- 'lɛtrɛ mu 'ɛ 'yi, 'waa -o -za 'bhɛɛke do 'kpɔ yɔɔndɛ 'zi 'ka ni, 'ke yaa 'e go 'ka -o 'kɛla tape 'zi, 'bhɛ 'pegee 'ka 'kɛla 'yima zii'

'mu -la ba. 'Bhɛɛ- 'mi 'kpale- -o -a -yi 'bhii- 'ka nu -a -yimalɛ kplankplan 'ke -a -lɛyan' -a ma.

14 'Bhii- 'kaa 'ke 'yimaa- gɔnɛ- 'la gbɛɛn- dɔɔ: Mɛɛzan Zesu 'nu yi 'ɛ 'le, 'o nu 'o -baalɛ' 'ka mu 'yi, 'bhɛɛ- 'ka mu nu 'ka -baalɛ' 'o mɔɔ 'yi 'ezin-.

15-16 'Ŋ 'kpale 'la 'yaa- -a -yi 'bhii- 'ka 'kpeejan- -yaa 'bhɛ gbɛɛn- bhe, 'ŋ 'yaa- zi 'bhii- 'ŋ ge -trɛɛ 'ka ba ye 'elwale 'pe, 'sani- 'ŋ ge Masedwani, 'bhɛɛ- 'ŋ 'niina- bhla 'ɛ zi Masedwani, 'ŋ 'yaa- nu 'kanlɛ- 'ezin- 'ka ba ye, 'kooko- 'ka bhɔ 'ŋ ba 'ke 'ŋ sɔ gele- 'tɛnlɛ- Zude 'klɛɛn 'ɛ ma. 'Bhɛ klɛgbɛya 'ɛ 'yi, 'ŋ 'yaa- nu -Waanbhaa' a 'duma 'ɛ 'nalɛ- 'ka ni ganyan- plɛ.

17 'Naa 'sɔlɛ- gelawole 'ka ba ye, -o sɔ -a pele- 'bhɛ ma dɔɔ 'naa 'ka ba geza 'ɛ 'kunlɛ- 'egloole ɛɛ? Taa- 'ŋ -za 'la 'lɛdulaa, 'ŋ 'bhɛ klɛ 'bhii- 'drunyan 'yi bhaaplɛŋ gbɛɛn- 'ke 'ŋ klɛ -liijan' plɛ wo mi 'le, 'bhɛɛ- 'ke 'an pe dɔɔ: «-Aani'», 'bhɛɛ- 'an pe 'ezin- «'Ŋn ɔn ɛɛ?»

18 -Waanbhaa' -o 'ke 'ŋ 'srɛ 'le, 'bhɛɛ- 'naa -o 'ke -liijan' plɛ mi wo mi 'le 'ke 'an pe dɔɔ: «-Aani'». 'Bhɛɛ- 'an pe 'ezin- «'Ŋn ɔn».

19 -Amasɔyi -Waanbhaa' Gbe Zesu Krisi 'la 'mi 'pegee Siliven 'bhɛɛ- Timote, 'o mɔɔ 'bhɛ 'la 'bhɛ a -Jan 'Nrɛalɛ- 'ɛ ɔwoa 'ka ba ye, 'bhɛ 'laa klɛlɛ 'ke -liijan' plɛ mi wo mi 'le 'ke -ya pe «-Aani'» -jan do ma, 'bhɛɛ- -ya pe «'Ŋn ɔn» 'yee- -jan do 'ɛ ma. Droon' 'ke -ya ɔpia 'kela ma «-Aani'», -e bo 'bhɛɛ- ta.

20 -Amasɔyi -Waanbhaa' 'bhɛ 'liiwli- -naa bhaaplɛŋ mu ni -za mu 'la klɛza ta, 'yee- Zesu Krisi -le 'mu 'kpen 'lɛswa. 'Bhɛla- -zayile, 'yela- 'tɔ 'ɛ 'srɔyi 'bhɛɛ- 'o sɔ -a pele- «Amiina». 'Bhɛɛ-

'o so -Waanbhaa' 'tobhōle.

21 'Yee- -Waanbhaa' 'gbu -le 'o mōo 'pegee 'ka mu dō 'egloole. 'Yela- 'gbu -le -kōo' mu -kpaā 'edanma -yaa' pē mu 'le.

22 'Yee- -Waanbhaa' 'gbu -le -a gbε blaān -kpalaa' -kōo' ma, 'bhεε- 'bhε -le -kōo' mu klε -yaa' pē mu 'le. 'Bhεε- -ya Lii 'Wen 'ε □wlaa -kōo' zru mu 'ε 'yi. -E -kōo' 'letwa□ pē -lrele' mu 'la ba, -e Lii 'Wen 'ε □kla 'mu 'yrε 'lεε pē 'le.

23 -Waanbhaa' -o 'η 'srε 'le, 'naa dōle -a -la 'ke 'η ge 'ezin- Korenti -wa 'ε ta, -amasrōyi 'naa -yaa zi 'bhii- 'η 'ka ta -yrēn 'ε baankpa' 'ezin-.

24 'Waa -o -a zi 'bhii- 'o klε 'ka ta -kunlii mu 'le 'kpaleya a pē zi 'ε ta. -Amasrōyi 'ka kli gbaanle -o 'egloole 'kaa- 'kpaleya 'ε 'yi. 'Duη- 'woo- -a zi 'bhii- 'o 'pegee 'ka mu yewo 'eke- zi, 'kooko- 'ka zrukpalaa.

2

1 'Bhε klegbeya 'ε 'yi, 'mi 'gbu 'a □kpaā 'η 'kpee dōo 'naa -o niinale 'ka ba ye, 'bhεε- 'η 'ka wleyisriwoza klε 'ezin-.

2 -Amasrōyi 'ke 'mi 'ka wleyisriwoa, -dele nu klεε 'mi zrukpaā mi 'le εε? 'Ka mu 'la 'ka -o 'mi zrukpaā' pē 'le, 'ke 'mi 'ka mu wleyisriwoa, 'ka mu nu 'solε- 'mi zrukpaale 'nale- -a ma εε?

3 'Bhēla- -zayile, 'mi 'lεtrε □kpaā 'ka ni 'bhε klegbeya 'ε 'yi, 'kooko- 'ke 'η □bhwa 'ka ba ye, mεε 'la zan mu -o 'ke 'mi zrukpaā pē le, 'mu 'laa 'mi wleyisriwo. 'Mi 'gbu 'kpale- -o -a -yi 'bhii- 'mi a pē zrukpaā' 'ε 'bhε -o 'ezin- 'ka mu 'kpen a pē zrukpaā' -la -le.

4 Wlan 'gbu 'ε ni, 'η 'letre 'la □kpa'a 'ka ni, -a kle bhla 'ε zi, 'η 'yaa- -yren -gbene 'yi, 'bheε- 'η blina-yien -yaa, 'bhe 'pegee wisi' -gbɔɔ -gbene -yaa 'η 'yre ta. 'Naa 'letre 'ε 'kpale- 'ka ni 'ka wleyisriwo zayi', 'duɲ-, 'η 'yaa- zi 'bhii- 'kaa 'yaango- 'bhii- 'ka -za sɔ 'η ni 'kee- kan -a -dan' ta.

Pɔlu pe dɔɔ -o -za 'yɔɔ- kle mi 'ε mazato

5 'Ke mεε do □kla mεε mu wleyisriwo pe 'le, 'bhe zan laa 'mi do -kplen wleyisriwole, 'duɲ- 'bhe zan 'ε 'ka 'kpen -la wleyisriwoa bhe. 'Duɲ- 'ke 'naa 'kanle- -a -dan' ta, 'η sɔ -a pele- dɔɔ -e 'ka 'ledo- 'ε ta wleyisriwoa.

6 'Ka -bebe 'a □kpa'a do ma dɔɔ 'ka nu 'bhe zan 'ε 'krowole 'krowogbeya 'la 'yi, 'bhe nu 'bhe zan 'ε 'yibhole 'bhe 'le.

7 'Bheε- drɔɔn', -ka 'bhe zan 'ε mazato, 'bheε- -ka fanɔandɔ -a ta; 'kooko- -a wleyisriwole 'ε 'bhe 'laa kan -a -dan' ta, 'bheε- 'bhe ge klele -a fanɔan- 'kanpe- le.

8 'Bhela- -zayile, 'mi -o zruwla 'zi 'ka 'kpee dɔɔ -kaa zrɔn 'bhe zan 'ε ni 'bhii- -a -za sɔ 'ka ni.

9 -Amasrɔyi 'mi 'letre □kpa'a 'ka ni win 'la ma, 'bhe -le -ge dɔɔ 'mi 'ka 'yidaan- 'ke 'η sɔ -a 'yaangole wlan 'gbu 'ε ma 'bhii- 'ka -o 'η 'wojan- mu 'ε 'klosikun zii' -za mu 'ε 'kpen 'yi.

10 'Ke 'ka mεε 'oo mεε 'la zan mazatwa, 'mi nu 'bhe zan 'ε mazatole 'ezin-. 'Bheε- 'ke 'mi mεε do mazatwa -za do 'yi, 'mi 'bhe □kla 'ka mu -la -zayi', 'bheε- Kri- si -o -kɔɔ' 'srε 'le.

11 'Bhe 'kpen win le dɔɔ 'ke -Setran' 'laa -dawli' 'kpaayre- -srɔwo' -kɔɔ' gbe ta. -Amasrɔyi -za mu 'la kle -lɔ -o -a ma 'o 'mu 'gbu dɔ.

Pɔlu -ja Titi 'lepale Troasi

¹² 'Mi 'bhɔlawoa Troasi -wa 'ε ta Kriɔi a -Jan 'Nrɔle- 'ε 'wo zayi', 'an ɔya 'bhii- Mɛzan -za mu 'ε 'kpen 'leswa ɔ gban 'η 'lɛɛ 'ke 'η sɔ yewole -a ni 'bhɛ ɔnɔɔ.

¹³ 'Duη- 'η blina- yiɛn -yaa 'egbenele, -amasɔyi 'η 'yɛ 'laa -yaa 'η nɛɛnɛ- Titi ma. 'Bhɛla- -zayile, 'η zi -yɛwole Troasi ɔnɔɔ mu 'ε ma, 'ke 'η gele- Masedwani -wa 'ε ta. *

Pɔlu -o -Waanbhaa' 'pubɔ- 'zi -Waanbhaa' bhɔlawoa -a ba 'bhɛ -zayi'

¹⁴ -Waanbhaa' 'ηcie! -Kɔɔ' mu 'pegee Kriɔi a 'kpaledomaya 'ε 'yi, gwle ηgblo 'la bole -o -a ni, 'bhɛ -o 'ezin- -kɔɔ mu a pɛ 'le 'taηii. -Yoo 'o winɔɔ 'kaa 'o ge Kriɔi dɔza 'ε mɛɛ mu 'kɔɔ -Jan 'Nrɔle- 'ε 'wo yɛkpen- ɔnɔɔ, 'bhɛ -Jan 'Nrɔle- 'ε zen 'bhii- -lasiklɔɔ -gblɛn 'nrɔle- 'ε zen yɛkpen- ɔnɔɔ gɔnɛ- 'la gbɛɛn-.

¹⁵ -Amasɔyi 'o ɔkla Kriɔi a pɛ 'le, 'bhɛɛ- 'woo- 'bhii- Kriɔi a -lasiklɔɔ -gblɛn 'nrɔle- do gbɛɛn- -Waanbhaa' ni. Mɛɛ 'la zan mu -o -bhee zi 'ε ta, 'bhɛ 'pegee mɛɛ 'la zan mu -o ni zi 'ε ta, 'yee- -lasiklɔɔ -gblɛn 'ε ten 'mu 'kpen ma.

¹⁶ Mɛɛ 'la zan mu -o ni zi 'ε ta, 'yee- -lasiklɔɔ -gblɛn 'ε -yoo 'eyɔɔle 'mu yin zi, 'bhɛɛ- -e sɔ -o dɛle-. 'Duη- mɛɛ 'la zan mu -o -bhee zi 'ε ta, -a -gblɛn 'ε nra 'mu yin zi, 'bhɛɛ- -e sɔ gele 'mu -le -si 'la 'ke -danη' 'laa -o 'bhɛ ma, 'bhɛ a zi 'ε ta. 'Bhɛɛ-

* **2:13 2.13** 'Kee- san yɛ 'lɛɛ- ma, Pɔlu 'laa nu -wɛlɛ' -li Titi 'le 'ke 'bhɛ ge 'tɛnɛ- 'lɛtrɛ 'lɛɛ- 'lɛ 'srwapɛ- mi 'ε ma. 'Yee- 'lɛtrɛ 'lɛ plɛ mi 'ε 'pegee -a -lɛ 'srwapɛ- mi 'ε 'plɛn-, -e nu -wɛlɛ' Mɛzan ye 'la gbɛkpaa- -a -kɔɔ 'bhɛɛ- 'le.

bhaaplɛŋ 'ɛ -de 'gbu -la fanŋan- sɔ 'bɛ ye -gloɔn
'ɛ 'wɔle- ta ɛɛ?

¹⁷ 'Duŋ- 'o mɔɔ 'gbu -le sɔ 'bɛ ye 'ɛ 'wɔle,
-amasrɔyi 'yee- -Waanbhaa' -le 'o 'winbwa-
'Bɛɛ- 'waa -o yaa -Jan 'Nrɛle- 'ɛ 'wo zii' -gɔli'
-glin zayi', 'bhii- mɛɛ 'ke mu -o -a klɛ 'zi gɔnɛ- 'la
gbɛɛn-. Drɔɔn' 'yee- -Waanbhaa 'o mɔɔ winbwa-
'yee- -Jan 'Nrɛle- 'ɛ 'woyrɛ- nɔɔ- *Krisi 'tɔ 'yi.
'Bɛla- -zayile, 'woo- -a wo 'zi 'o 'pegee Krisi a
'kpaledomaya 'ɛ 'yi, 'bɛ 'pegee 'o 'kpee 'fleele-
'le 'yee- -Waanbhaa' -yrɛ □la.

3

-Bhoolaya drɛɛ 'ɛ ta yewonɛ mu

¹ 'Nj -janwoa 'bɛ gbɛɛn- bɛ, 'bɛ 'yi -le dɔɔ 'o
mɔɔ 'gbu maza -o 'ke 'o ge 'o 'gbu zrɔn 'lɛtrɛ 'le 'o
'kɔɔ 'ka ba ye 'ezin- ɛɛ? 'Bɛɛ- 'kaa- zi 'bhii- 'o ge
'ka ba ye 'o 'gbu zrɔn 'lɛtrɛ 'le 'ka ni 'bhii- mɛɛ 'ke
mu 'a □kla gɔnɛ- 'la gbɛɛn- bɛ ɛɛ, taa- 'kaa- zi
'bhii- 'woo 'gbu dɔ 'lɛtrɛ 'yrɛwo 'ka ma 'ke 'o 'bɛ
zrɔn mɛɛ -bɛɛke' mu ni 'bhii- 'woo- 'ke Krisi a
winbɔwo mu -zeze 'gbu 'le ɛɛ?

² 'Lɛtrɛ 'la 'bɛ 'a zrɔn 'bhii- 'o mɔɔ -o Krisi a
winbɔwo mu -zeze mu 'gbu 'le 'bɛ -le 'ka mu
'gbu 'le. -A yɔɔndɛle -o 'o zru mu 'ɛ 'yi, mɔkpen'
sɔ -a dɔle-, 'bɛɛ- mɔkpen' sɔ -a tapele.

³ Wlan 'gbu 'ɛ ni, 'ka mu 'gbu -le kpataakpa
'o mɔɔ zrɔn 'lɛtrɛ 'la Krisi 'bɛ yɔɔndia- 'bɛ
-le 'waa ye 'ɛ 'srɔyi. Waa yɔɔndɛle 'ke
'sɛwɛ yɔɔndɛpɛ -yi 'le, 'duŋ- -wa yɔɔndia- 'ke
-Waanbhaa' 'la -ya -yrɛ ma 'bɛ Lii 'Wɛŋ 'ɛ 'bɛɛ-
'le. Waa yɔɔndɛle vlɛpee' mu ta, 'duŋ- -wa
yɔɔndia- bhaaplɛŋ mu -la zru mu 'ɛ 'yi.

4 'O 'kpale- -o 'bhεε- -jan 'ε 'yi Krisi 'srɔyi -Waanbhaa' -yɾε □la.

5 'Waa sɔ a pele- dɔɔ 'bhe 'senj -o 'o 'gbu ni 'ke 'o 'bhe ye 'lεε- wo, 'duŋ- 'waa- pε 'senj 'ε 'bhe da -Waanbhaa' -la ba.

6 'Yele- 'a □kla 'bhεε- 'o mɔɔ -swa klele- -yaa' yewone mu 'le -bhoolaya dɾεε 'ε ta. 'Bhe -bhoolaya dɾεε 'ε kli gbaanle laa -o *'Tonj 'la -o 'bhe yɔɔndia- 'bhe ta, 'duŋ- 'bhe kli 'ε gbaanle -o Lii 'Wenj 'ε 'bhεε- ta. 'Tonj 'la -o 'bhe yɔɔndia- 'bhe ge mεε 'le ga a pε zi 'ε ta, 'duŋ- Lii 'Wenj 'ε 'bhe -si 'la 'ke -danj' 'laa -o 'bhe ma 'bhεε- na mεε ni.

7 'Tonj 'la 'bhe 'sɛwɛbhe mu 'ε 'yɔɔndεle -yaa vlɛpee' mu ta, 'bhεε- 'ke 'bhe 'woye- -le -yaa 'ke mεε gelele ga a pε zi 'ε ta, 'bhe 'na bhla 'ε zi -Waanbhaa' 'kɔɔ Moizi ni 'yee- -Waanbhaa' a 'tɔbhɔleya -bhile' -yɾayɾa 'ε 'pwɛla- -a -yi. 'Bhεε- 'bhe Moizi wleyi' 'ε mabɔɔla -asiikɔɔ Izraeli -nε mu 'ε waa -yaa 'sɔle -a wleyi' 'ε -glinle'. 'Duŋ- 'bhe 'tɔbhɔleya -bhile' -yɾayɾa 'ε 'bhe 'laa -yaa 'ke -mɔpε' 'le.

8 'Ke 'Tonj 'la 'bhe 'woye- -le -yaa 'ke mεε gelele ga a pε zi 'ε ta, 'bhe 'tɔbhɔleya -bhile' -yɾayɾa 'ε 'yaa- 'bhe gbεen- bhe, 'bhe 'yi 'tε, Lii 'Wenj 'ε 'bhe 'woye- 'ε 'tɔbhɔleya -bhile' -yɾayɾa 'ε gblaan -yi 'laa nu yale- -yaa' pε 'ε ni εε?*

9 'Tonj 'la 'bhe 'woye- -le 'ke -Waanbhaa' a -kpan baalele bhaaplɛŋ ta, 'ke 'bhe a 'tɔbhɔleya -bhile' -yɾayɾa 'ε 'yaa- 'bhe gbεen-, Lii 'Wenj 'la 'bhe

* **3:8 3.7-8** Pɔlu -o -bhoolaya gwe 'ε 'pegee -bhoolaya dɾεε 'ε dan 'zi 'eke- ma. -Bhoolaya gwe 'ε 'bhe kli gbaanle -yaa 'tonj mu ta, 'duŋ- -bhoolaya dɾεε 'ε 'bhe kli gbaanle -o Lii 'Wenj 'ε 'bhεε- ta.

bhaaplɛŋ -lɛdɔɔ' -Waanbhaa' -yrɛ 'yi, 'bhɛ a pɛ 'woyɛ- 'tɔbhɔleya -bhilɛ' -yrayra 'ɛ gbɫaan -yi 'laa nu yalɛ- -yaa' pɛ 'ɛ ni ɛɛ?

¹⁰ Wlan 'ɛ ni, 'tɔbhɔleya 'la ɔbhia 'ɛlwaleta -sɔ 'bhɛ gbɛɛn- bhe, 'bhɛ 'laa -o 'ke -za 'kɛdo- 'kpɔ 'lɛ 'ke -wa -kpaɔ -zɔn 'tɔbhɔleya 'la -gbɛnɛ 'yiya- -a ni 'yi 'bhɛ ma.

¹¹ -Amasɔyi, 'ke 'kɛla 'yaa- 'ke 'kanpɛ- 'lɛ 'bhɛ 'tɔbhɔleya 'ɛ 'yaa- bhi, 'kɛla 'bhɛ 'laa -o 'ke 'kanpɛ- 'lɛ 'sekɛsɛkɛ, 'bhɛ a pɛ 'tɔbhɔleya 'ɛ yaa nu 'kanlɛ- 'kɛla 'bhɛ -o 'ke 'kanpɛ- 'lɛ 'bhɛ a pɛ 'ɛ ta ɛɛ?

¹² 'O 'yrikpale -o 'bhɛ ta 'bhɛ gbɛɛn- bhe, 'bhɛla- -yilɛ, 'waa gbɫaan mɛɛ 'kɛdo- 'kpɔ 'lɛɛ -Jan 'Nrale- 'ɛ 'woyrɛ- nɔɔ-.

¹³ 'O mɔɔ laa -a klɛ 'bhii- Moizi gbɛɛn-. -E sɔ ɔklaa -a wɛyi', 'kooko- -Waanbhaa' a 'tɔbhɔleya 'la 'yaa- -bhi 'zi -a wɛyi', Izraɛli mu 'ɛ waa 'bhɛ 'tɔbhɔleya 'la 'yaa- 'ke 'kanpɛ- 'lɛ 'bhɛ 'liiyɛ- 'ɛ ye.

¹⁴ 'Duŋ- Izraɛli mu 'ɛ -woo 'trɔn 'yi -dwa 'ɛglɔɔle -Waanbhaa' ma. -Amasɔyi 'ali- -zɔn -li, 'ke -woo -bhoolaya gwe 'ɛ ta 'sɛwɛ 'ɛ tape 'zi, -yoo 'bhii- sɔ do 'la 'klalɛ- -yaa Moizi ŋgblo ma 'bhɛ 'yansi -glɔɔn -la 'kpale- -o yikan' 'ɛ 'yrɛ ta. 'Bhɛɛ- waa 'yɛɛ- 'sɛwɛ 'ɛ 'yima-. 'Bhɛ sɔ 'ɛ 'bhɛ 'laa sɔ gole- 'fɔkɛ mɛɛ ɔwlaa Krisi 'pegeɛ bhaaplɛŋ mu a 'kpaledomaya 'ɛ 'yi; 'yɛɛ- Krisi do -kplɛn -lɛ sɔ 'bhɛ sɔ 'ɛ gole- mɛɛ yikan' 'ɛ 'yrɛ ta.

¹⁵ 'Ali- -zɔn -li, 'ke -woo Moizi 'sɛwɛ mu 'la ɔdia 'mu tape 'zi, -yoo 'bhii- sɔ 'klalɛ -o yikan' 'ɛ 'yrɛ ta; 'bhɛɛ waa sɔ -o -yimale.

¹⁶ 'Duŋ- -a pele -o -Waanbhaa' a 'Sɛwɛ 'ɛ 'yi dɔɔ: «'Ke mɛɛ 'la zan 'bhɛ zru 'ɛ 'niinaa- Mɛɛzan ba,

'bhεε- -e -dwa -yaa' -jan 'ε □la, -e 'yee- sɔ 'ε go 'bhε zan 'ε yikan' 'ε 'yɾε ta.»

17 'Duŋ- 'woo- -we 'zi Mεεzan 'la le, 'bhε -le 'ke -Waanbhaa' Lii 'Wεŋ 'ε 'le. 'Bhεε- 'ke Mεεzan Lii 'Wεŋ 'ε -yoo mεε 'oo mεε 'la zan zru 'yi, 'bhε zan bo 'bhε 'gbu ma.

18 -Kɔɔ' mu 'la 'kɾεn wleyi' tapwεle -o, 'kɔɔ- mu Mεεzan -Waanbhaa' a 'tɔbhɔleya 'ε zɾɔn mεε mu 'ε ni -kɾɔsɔɔ 'bhii- -dwalen' pε 'kɾεn tapwε ɔnε- 'la gbεεn- gbaklata. 'Bhε 'yi Mεεzan Lii 'Wεŋ 'ε -kɔɔ' zru mu 'ε mabɔɔ yi 'oo yi, 'kooko- -kɔɔ' 'pwεle- klε 'yee- Mεεzan 'le. 'Bhε 'yi, -kɔɔ' go 'tɔbhɔleya do 'yi 'ezin-, 'bhεε- -kɔɔ' ge 'tɔbhɔleya -bhεεke' gbilaan do 'yi. Mεεzan Lii 'Wεŋ 'ε 'woye- 'ε -yoo 'bhεε- gbεεn- bhe.

4

Pɔlu 'pegee -yaa' yewoyɔɔn mu 'ε -waa' yewogbeya

1 'O 'yɾεnklalawoa -Waanbhaa' ma, -e -yaa' -Jan 'Nrale- 'ε 'wole- 'ε gbεkɾaa- 'o 'kɔɔ, 'bhεla- -zayile, 'o -gblozi' laa ga 'o ma.

2 Bhaaplεŋ mu -yɾaladɔ maza mu 'la 'kɾεn klε gaanyi', 'woo -baŋgwa 'mu 'kɾεn klεle 'yi. 'Bhεε- 'waa -dawli' maza mu klε, 'bhεε- 'waa -Waanbhaa' a -Jan 'ε mabɔɔ. Drɔɔn' 'woo- wlan 'la 'pe zii' kɾpataakɾa -Waanbhaa' -yɾε □la, 'ke wlan -le 'kεle- oo, 'ke bhla -le 'kεle- oo, bhaaplεŋ 'tɔle- bhaaplεŋ 'bhε 'bhε ye.

3 'Bhεε- 'duŋ-, 'woo- -Jan 'Nrale- 'la 'wo zii', 'ke 'bhε bakanle laa -o kɾlankɾlan mεε 'ke mu -yɾε

'yi; 'bhe bakanle laa -o mee 'la zan mu -o 'mu 'ni zi 'e ta 'mu -la -yre 'yi.

⁴ 'Bhe zan mu 'e waa -o kpa Zesu 'yi, -amasroyi *-Setran' 'la gbebloole -o 'drunyan 'lee- ta, 'bhe -gblo □kpa -o yikan' 'e 'yre ta; 'koko- waa so Kri a -Jan 'Nrle- 'e 'bhe a 'toholeya -lrele' 'e 'bhigbeya 'e 'yele. 'Yee- Kri -le 'ke -Waanbhaa' bhooma 'e 'le.

⁵ Wlan 'e ni, 'waa -o -Jan 'Nrle- 'e 'wole- 'e kle 'zi 'o 'gbu ma janwolele. 'Dun- 'woo- Meezan Zesu Kri a -Jan 'e 'bhe- 'wo zii', 'ke 'wa pe 'o 'gbu ma doo 'woo- 'kaa- yewone mu 'le Zesu -zayi'.

⁶ -Amasroyi -Waanbhaa' 'la -ya □pia doo: «'Tebhile kle -gblo 'e 'yi!» 'Yee- -Waanbhaa' do 'kpo 'e 'yele- 'tebhile □klaa -koo' zru 'e 'yi, 'koko- -Waanbhaa' a 'toholeya 'la -yoo -bhi 'zi Kri wleyi', 'o 'bhe do 'o zru mu 'e 'yi.

Polu 'pegee -yaa' yewoyoon mu 'e ta -yren mu

⁷ 'Bhe 'toholeya 'e dole 'e 'o 'koo 'bhe -o 'bhii- naflo -gbene do 'la 'kpale- -o 'tre gbo mu 'yi. 'O moo 'la 'woo- 'bhe -naflo 'kwe 'e 'si zii', fangan- 'laa -o 'o 'gbu ta, 'bhe- 'woo- 'ke 'siepe- 'le 'bhii- 'tre gbo mu gbene-; 'koko- mokpen' 'a ye 'bhii- 'bhe -glooya' -gbene 'lee- 'bhe da -Waanbhaa' -la ba, 'bhe- 'bhe 'laa da 'o moo 'gbu ba.

⁸ Bhaaplen mu -o -yren -gloon 'e 'kpen kpa zii' 'o ta; 'dun- 'o fangan- 'e yaa yan. 'O zru ba 'te -o; 'dun- 'o 'yrikpale bo -Waanbhaa' -la ta.

⁹ -Woo' 'yrebatedo 'zi 'ke -o -yrenkpa' 'o ta; 'dun- -Waanbhaa' laa 'a -bango' 'o 'yi. -Woo' balaa' 'tre ma, 'bhe- -woo' tafe; 'dun- -Waanbhaa' 'o 'lawlen-.

10 'Waati 'ε 'kpen ba, 'ke 'o -ja yre 'oo yre 'la
 □□□□, -woo' dεyre -la -glin 'zi 'bhii- -o Zesu □dia
 gone 'la gbεen-. 'Duη- -Waanbhaa' gbε -o ta,
 'kooko- mօkpen' 'a ye 'bhii- Zesu -o -a -yre ma
 'o 'fle mu 'ε 'yi.

11 'Ali- 'woo- 'yre 'la ma bhe, -woo 'o dεyre -la
 -glin 'zi 'tanii Zesu 'to 'ε -zayi'; 'kooko- -wa ye
 'bhii- 'yee- Zesu -o -a -yre ma 'o 'fle mu 'la 'mu
 -o 'ke gapε 'le bhe 'mu 'yi.

12 -Woo 'o mօ□ dεyre 'la -glin 'zi bhe, 'bhεε-
 'duη-, 'bhε blaان kle 'ka mu a pε bole -yre ma -si
 drεε 'ε 'srօ□wolele.

13 'Bhεε- -Waanbhaa' -lela' janwo mi 'ε do 'a pia
 -Waanbhaa' a 'Sεwe 'ε 'yi dօ□: «'Mi 'η 'kpalawoa
 -Waanbhaa' 'yi, 'bhεla- -zayile 'mi -janwoa -a 'to
 'ε 'yi.» 'O mօ□ 'o 'kpalawoa -Waanbhaa' 'yi 'ezin-
 'bhεla- -zayile 'woo- -yaa' -Jan 'Nrале- 'ε 'wo zii'.

14 Wlan 'ε ni, 'o 'kpale- -o -a -yi 'bhii-
 -Waanbhaa' 'la Mεεzan Zesu -bwela gale ba, 'bhε
 -le nu 'o mօ□ 'pegee 'yee- Zesu bwelε gale ba 'eke-
 'yi 'ezin-, 'bhεε- 'bhε -le nu 'o mօ□ 'pegee 'ka mu
 'pwele- 'eke- zi Zesu 'lεε.

15 'Woo- -za mu 'la 'kpen 'yikun zii', 'o 'mu kle 'zi
 'ka mu -la -zayi', 'kooko- -Waanbhaa' -yaa' -lileya
 'ε zrօn mεε -bebe ni, 'bhεε- 'bhε gbεen- bhe, mεε
 -bebe nu 'yee- -Waanbhaa' 'pubօle, 'bhεε- -a 'to 'ε
 baan' nu bhօle.

'Taawole 'kpaleya ma

16 'Bhεla- -zayile, 'waa -o 'o 'gbu -gblozi' gale-
 'Ali- 'ke 'o 'fle 'lεε- 'bhε -o 'sie zii', fanğan- drεε -le
 dօ 'zi 'o 'nii- 'ε ta yi 'oo yi.

17 -Amasroyi -yren 'fientronne 'la 'bhe -o -koo' ta -zon, 'bhe nu 'kanle-. 'Bhe -yren 'e blaani nu klele 'ke 'tobholeya -gbene do 'la 'ke -dan' 'laa -o 'bhe ma -titi 'bhe- 'le; 'bhe gbalaan -yiya' 'yee-koo' ta -yren 'fientronne 'le- ni.

18 'Bhe 'yi bhe, mee pe mu 'la ye -a -yre 'le, 'o moo laa -o 'mu -glin 'zi. 'Dun- mee laa pe mu 'la ye -a -yre 'le, 'bhe- 'ke 'mu -o -Waanbhaa' ba, 'o moo -yre -o 'mu -la ta. -Amasroyi -o pe mu 'la ye -o -yre 'le, 'mu -o 'ke 'kanpe- 'le; 'dun- mee laa pe mu 'la ye -a -yre 'le, 'bhe- 'ke 'mu -o -Waanbhaa' ba, 'mu 'laa kan -titi.

5

1 'Fle 'la 'bhe -o 'o ma 'tre ta -ge, 'bhe -o 'bhii- so 'kpaa do gbene-. 'Wa 'yaango- doo 'ke 'bhe 'siela- 'waati 'la ba, 'fe 'lrele- do dole -o 'o 'le lafle' 'yi. Bhaaplen mu laa 'bhe 'fe 'e dole -o gbe 'le. 'Dun- -Waanbhaa' 'gbu -le 'bhe -dwa. 'Bhe 'fe 'e yaa so 'siela -titi.

2 'Woo- 'saanige 'drunyan 'la 'yi -ge bhe, 'woo wisi' zii', -amasroyi -a -lro -gbene 'gbu -o 'o ma 'ke 'o ge -Waanbhaa' ba, 'bhe- -e 'waa- 'fle dree 'e kla 'o ta.

3 'Wan 'e ni, 'ke 'o 'bhe 'fle dree □klaa 'o ta 'waati 'la ba, 'o tafle- 'laa nu bole.

4 'Ke 'woo 'waa- 'tre ta 'fle 'le- 'yi 'waati 'la ba, 'yi 'oo yi 'trebho 'pegee wisile -le 'o ta 'ke 'kwe 'le. Yaa klele 'bhii- 'fle 'la 'bhe -le 'o ma 'tre 'le- ta -ge, 'woo- -a zi 'bhii- 'o 'bhe go 'o ma. 'Dun- 'woo -a zi 'bhii- 'fle dree 'la 'bhe -o lafle' 'yi, 'o 'bhe- kla 'o ta; 'koko- 'waa- 'tre ta 'fle 'la 'bhe -o 'ke gape 'le,

-Waanbhaa' 'bhε taboo 'ke 'fle drεε 'la 'ke -dan' 'laa -o 'bhε 'si 'ε ma -titi 'bhε 'le.

⁵ -Waanbhaa' 'gbu -le 'bhε 'fle drεε 'ε □kla 'o ni. -E Lii 'Wen 'la □naa 'o ni, -e 'bhεε- -dwa -za 'wlan mu 'la -e nu 'mu klεε 'o ni lafle' 'yi, 'mu 'yrε 'lεε pε le.

⁶ 'Bhεla- -zayile, yi oo yi, 'woo zru do 'egloole. 'Wa 'yaango- 'ke 'o □bwa 'o 'fle 'lεε- 'yi 'trε 'lεε- ta -gε, 'o 'plengole -o Mεεzan ma 'egboonle.

⁷ 'Woo- 'taawo zii' pε 'la 'o 'kpale- -o 'bhε 'yi 'bhεε- zi, 'duη- 'waa- -o 'taawo zii' pε 'la 'o 'bhε ye 'o 'yrε 'le 'bhε zi.

⁸ Yi 'oo yi, 'woo- zru do 'egloole. 'Woo -a zi 'bhii- 'fle 'la 'bhε -o 'o ma 'trε 'lεε- ta -gε, 'o go 'bhε 'yi, 'bhεε- 'o ge bolε Mεεzan Krixi -din.

⁹ 'Bhεla- -zayile', 'ke 'o -gaa oo, 'ke 'o □bwa 'e 'yrε ma oo, 'woo- do 'zi 'egloole, 'kooko- 'o -za so 'yee- Mεεzan ni 'elwale 'pe.

¹⁰ -Amasroyi -koo' 'kpen nu gele dulale Krixi a -klu 'ε 'le ma, 'bhεε- -e nu -koo' 'kpen 'kitikanle; 'kooko- -koo' 'kpen do do -za 'oo -za 'la □kla 'drunyan ta -gε, 'kee- -kla -za 'wlan 'le oo, 'kee- -kla -za 'yoo- 'le oo, -koo' 'bhε ma -sra 'srōwo-.

Krixi -le -Waanbhaa' 'pegee bhaaplen mu kpa do ma

¹¹ 'Wa 'yaango 'bhii- -gblaanle' Mεεzan -lεε 'bhε -o 'ke -za 'wlan 'le, 'bhεla -zayile 'wa klε 'zi gbε 'ε 'kpen ma 'ke -yaa' -jan 'ε do mεε mu 'ε 'yi, 'bhεε- 'ke -wa ye 'ke wlan 'le. 'Yee- -Waanbhaa' 'o moo 'gbu do kpataakpa, 'bhεε- 'mi 'kpale- -o -a -yi 'bhii- 'ka mu 'gbu 'o moo do 'ezin- 'elrele 'ka 'gbu 'kpee.

12 'Waa -o 'bhe 'pe zi, 'kooko- 'woo 'gbu 'tobho- 'ka 'yre ta 'ezin-, 'duŋ- 'woo- 'bhe 'pe zii' win 'la ma 'bhe -le doo 'ke 'ka so 'ka 'wasowole 'o 'yi 'o 'woye- 'ε -zayi'. 'Ke 'bhe □kla, mee 'la zan mu -o 'gbu 'wasowo zii' 'kela 'yi 'peeli-, 'bheε- 'duŋ-, 'ke waa -o 'bhe 'le -o 'gbu 'kpee; 'ka so -jan zikpale 'bhe zan mu 'ε ni goŋε- 'la gbεεn-, 'ka 'bhe do.

13 Wlan 'ε ni, 'ke mee 'ke mu -o 'o 'ye zii' 'bhii- 'kwanii' mu, 'duŋ- 'waa -o 'bhe 'le, -Waanbhaa' a ye 'ε -zayi'. 'Bheε- 'ke -woo' □kwan mee kplankplan mu 'le, 'bhe -o 'ka mu 'gbu -la ma 'ke -trɔn 'le.

14 -Amasɔyi 'o -za □swa Kriisi ni goŋε- 'la gbεεn- 'bhe 'a kle 'bheε- 'o -za 'kpen kle 'soniya 'le 'o 'yi. 'O moo 'kpale- -o -a -yi 'bhii- 'ke 'yee- do -kplen -gaa -koo' 'kpen -zayi', 'bhe bhla 'ε ba, -yoo 'bhii- -koo' mu 'kpen 'pegee 'yee- -gaa 'eke- 'yi.

15 -E -gaa -koo' mu 'kpen ni, 'kooko- mee 'la zan mu -o 'mu -yre ma, 'bhe zan mu 'laa 'taawo 'mu 'gbu win ta 'ezin-; 'duŋ- -o 'taawo Kriisi 'la -gaa, 'bheε- 'kee- -bwela, 'bhe a pe zru maza 'ε 'bheε- ta.

16 'Bhe klegbeya 'ε 'yi 'saanige, 'waa mee 'kedo- 'kpo kun -li bhaaplen a pe 'kungbeya drɔŋ 'ε 'yi. 'Ali- 'ke 'elwaleta -so 'o Kriisi -kwan bhaaplen a pe 'kungbeya drɔŋ 'ε 'yi, 'duŋ- 'saanige 'waa- kun -li 'bhe 'kungbeya 'ε gbεεn-.

17 -Amasɔyi 'ke mee do 'pegee Kriisi 'kpale- -o do ma, 'bhe zan 'ε zru 'ε maboo, 'bheε- -e kle mee drεε 'le. -A kleza gwe mu 'ε 'mu 'trunwo-, 'bheε- -a kleza mu 'ε 'kpen kle 'edreεle 'te.

18 'Bhe 'kpen da -Waanbhaa' -la ba, 'yele- -koo' mu 'pegee 'yee- 'gbu □kpaa do ma Kriisi

'sroyi. 'Bhεε- 'yele- 'yee- 'pegee bhaaplenj a 'kpaledomaya ye 'ε gbεkpa- 'o mɔɔ 'kɔɔ.

¹⁹ -Amasroyi 'yee- -Waanbhaa' 'gbu 'yaa- Krisi 'yi bhe, -e -yaa 'yee- 'pegee bhaaplenj mu 'kpen 'kpa zii' do ma. Yaa -yaa -o kleza -yɔɔ' mu 'ε bɔ 'zi -klosi 'yi. 'Bhεε- -ya -pia 'o ni dɔɔ 'o 'yee- 'pegee bhaaplenj a 'kpaledomaya ye 'ε 'wo.

²⁰ 'Bhela- -yile, 'o mɔɔ -o -janwo' zii' Krisi 'to 'ε 'yi. -Yoo 'bhii- 'yee- -Waanbhaa' 'gbu -le zruwla 'zi mεε mu 'ε 'kpee 'o mɔɔ -liijan' mu 'ε 'le. 'O -sromabɔ 'zi 'ka ni 'yee- Krisi 'to 'ε 'yi dɔɔ -kaa 'to 'ke 'ka 'pegee -Waanbhaa' kpa do ma.

²¹ Krisi 'laa -za 'yɔɔ- do 'kpɔ kleε, 'duj-za 'yɔɔ- -kpan 'la 'yaa- nu baale -kɔɔ' mu ta, -Waanbhaa' 'bhε balaa' 'a ta, 'kooko- -kɔɔ' mu 'pegee 'yee- Krisi a 'kpaledomaya 'ε 'yi, -kɔɔ' kle mεε -ledɔɔle mu 'le -Waanbhaa' -yre 'yi.

6

¹ 'O klelawoa 'ke yewoyɔɔn mu 'le -Waanbhaa' ba, 'woo- -sromabɔ 'zi 'ka ni dɔɔ 'ka 'laa -yaa' -lileya 'ε 'sroowoza 'ε kleε 'ke bhaama za 'le.

² -Amasroyi -Waanbhaa' 'a □pia dɔɔ:
«'Mi 'a pε -lileya zɔn 'waati 'ε 'bhɔle-, 'mi 'η 'trɔnkpa- 'kaa- 'seri 'ε □la, 'bhεε- 'an 'lekun,
'bhεε- 'mi 'ka -gwa -za 'yi 'bhε yi 'ε 'le.» 'Bhε 'yi bhe, -zɔn -le 'ke -Waanbhaa' a pε -lileya zɔn yi kplankplan 'gbu 'ε 'le; 'bhεε- -zɔn yi 'ε 'bhε -le 'ezin- 'ka go yi 'gbu 'ε 'le -za 'yi.

³ 'Waa- -o -a zi 'bhii- mεε 'kedo- 'kpɔ 'waa- ye 'ε 'to 'yɔɔ- pe. 'Bhela- -zayile 'waa- -o -a zi 'bhii-

'o kle -Waanbhaa' a zi 'ε 'liitan pe 'le mεε 'kedo-
'kpo 'λεε.

⁴ 'Bhεε- droon', 'wa kle 'zi gbe 'ε 'kpen ma,
'kooko- -woo' ye 'bhii- -Waanbhaa' a yewone
kplankplan mu 'le. 'Bhela- -yile, 'woo- -yren 'ε
'kpen -gloon 'yikun zii' 'o zrubakpaa -gbene 'le,
'kee- □kla wisi' -gboɔ doza mu 'le oo, 'kee □kla
'trebhɔza mu 'le 'oo, 'woo- 'mu 'kpen 'yikun zii'.

⁵ -Woo' zita □zwan, 'bhε 'pegee -woo 'o □bwa
-kaso 'yi, 'bhεε- -o mεε mu -lawlenna 'o ma. 'O
ye -gloo -gloon 'yoo- 'ε 'kpen 'yikwan□. Yidekleya
'pegee gbɔn yikunle, 'o 'mu 'kpen 'yikwan□.

⁶ 'O 'taawogbeya mu 'ε bakanle -o, 'o
-Waanbhaa' do, 'bhε 'pegee 'o zrubakpaale -o, 'o
zru lele, Lii 'Wen 'ε -yoo 'o zru mu 'ε 'yi, 'bhε
'pegee mεε mu -za so 'o ni 'soniya -zeze 'gbu 'le.

⁷ 'O -Jan 'nrale- 'ε wo wlan ma, 'bhε 'pegee
-Waanbhaa' a -glooya' 'ε 'le. 'O -ledɔleya -la kle
'waa- gwledanpe 'le 'o 'soonnii 'ε ba, 'bhε 'pegee
'o 'gbu ta gwledanpe 'le.

⁸ Mεε 'ke mu 'o 'tɔbhɔ-, 'bhεε- -a 'ke mu 'o
mavεε 'ezin-. -A 'ke mu 'o 'tɔ wlan pe, 'bhεε- -a
-bhεeke' mu -o 'o 'tɔ 'yoo- pe 'ezin-. -Woo' ye 'bhii-
bhla pe mu, 'bhεε- 'duɲ- 'woo- 'ke wlan pe mu -la
-le.

⁹ -Woo' glin 'bhii- waa 'o do, 'bhεε- 'duɲ-
mɔkpen' 'o do. -Woo' ye 'bhii- ga mu, 'bhεε- 'duɲ-,
'woo- 'o 'yre ma -li kpataakpa. -O -yrenkpa' 'o ta,
'bhεε- 'duɲ- waa so 'o dele-.

¹⁰ -O wleyisriwoza kle 'o ni, 'bhεε- 'duɲ- 'o
zrukpaale -o 'egbenele 'tanii. -Woo' ye 'bhii-
'kooflenzan mu, 'bhεε- 'duɲ-, 'woo- mεε -bhεeke'
-bebe mu kle 'zi pezan mu 'le. -Woo' ye 'bhii- pe

'kedo- 'kpɔ 'laa -o 'o 'kɔɔ, 'duŋ- 'waa- pɛ -le 'ke pɛ 'kpen 'le.

¹¹ 'O 'yienii Korenti mu, 'o -janwoa 'ka ni kpataakpa, 'bhɛɛ- 'waa -za 'kedo- 'kpɔ gaanɛ 'ka ma -titi.

¹² 'Ka mu 'gbu -za sɔ 'o ni 'o zru 'ɛ 'kpen 'le, 'bhɛɛ- 'duŋ- 'ka mu laa 'o mɔɔ -vavade.

¹³ 'Bhɛ ya 'ɛ 'yi, 'mi -o -janwo' zii' 'ka ni 'bhii- nɛ dɛ do -janwo' -a -nɛ mu ni gɔnɛ- 'la gbɛɛn- 'Duŋ- 'ka mu 'ezin-, 'o -za 'sɔ 'ka ni, -ka 'ka zru 'ɛ 'liiploo- 'o ni, 'bhɛɛ- 'ka 'laa 'ka 'kpɛɛ gaanɛ 'o ma -titi.

Mɛɛ 'la zan mu laa -Waanbhaa' dɔ 'mu 'pegee Zesu 'yi mu dɔ laa sɔ klɛɛ- 'eke- ta -za 'yɔɔ- 'yi

¹⁴ Mɛɛ 'la zan mu laa -o kpa -Waanbhaa' 'yi, 'ka 'pegee 'mu laa wlalɛ -za dɔ ma. Taa- -lɛdɔɔleya 'pegee -yɔɔya' -o do ɛɛ? Taa- 'tɛbhile 'pegee -gblo -o do ɛɛ?

¹⁵ Krisi 'pegee Beliali 'sɔ 'kpale do ma 'nale- -a ma ɛɛ? Taa- mɛɛ 'la zan 'e kpa -Waanbhaa' 'yi, 'bhɛ 'pegee mɛɛ 'la zan laa 'e kpa -Waanbhaa' -yi -waa' -za 'ɛ -dele 'eke- ta ɛɛ? *

¹⁶ -Waanbhaa' Gba 'Fɛ -Gbɛnɛ 'ɛ 'pegee yo mu -o do ɛɛ? -Amasɔyi -Waanbhaa' 'la -ya -yɛ ma 'o mɔɔ 'flɛ 'ɛ 'bhɛ -le 'ke -a gba 'fɛ -zeze 'gbu 'ɛ 'le, 'bhii- 'yee- -Waanbhaa' 'gbu 'a ɲpia gɔnɛ- 'la gbɛɛn- dɔɔ:

«Mi nu yaalɛ -o plɛŋ-, 'bhɛɛ- 'ɲ nu klɛɛ -o ba 'ke -o -ja yɛɛ 'oo yɛɛ 'la ɲnɔɔ.

'Mi nu klɛɛ waa -Waanbhaa' 'le, 'bhɛɛ- 'woo- nu klɛɛ 'mi a pɛ mɛɛ mu 'le.»

* 6:15 6.15 -Setran' 'tɔ -le 'ezin- Ebre wli 'ɛ 'yi Beliali

17 'Bhela- -zayile, MEEZAN -Waanbhaa' pe 'ezin-
doo:

«-Ka 'ka go -o plen-; 'bhεε- -ka 'ka 'plenjo- -o ma.
'Ka 'laa 'kunle- pe 'la 'bhε 'laa -o 'wen 'bhε ma.
'Ke 'ka 'bhε □kla, 'bhεε- 'mi nu 'η gbεdole 'ka □la
'tε.

18 'Mi nu klεle 'ka Dε 'le,
'bhεε- 'ka mu nu klεle 'mi gbe mu 'pegee 'mi 'lu mu
'le.

MEEZAN -Waanbhaa' 'Senkpenzan 'a □pia 'bhεε-
gbεεn- bhe.»

7

1 'N 'yiēnii mu, -Waanbhaa' 'a 'liiwli- nalawoa
-za mu 'la ta -koo' ni 'bhε gbεεn- bhe, 'bhela-
-zayile, -koo' -koo' 'fle mu 'ε 'pegee -koo' zru mu
'ε kle 'wen 'ke -koo' go 'trinjo- maza 'tole- 'trinjo-
maza 'bhε 'yi. -Koo' do klēn 'ke -koo' klεle 'wen
'ε 'lepale klε, 'bhεε- 'ke -koo' 'taawo- -Waanbhaa'
a -lεεgblaanya 'ε 'yi.

Polu zrukpaaza

2 -Ka 'ka zru mu 'ε 'liigo- 'o ni, 'bhεε- 'o -za
'so 'ka ni 'ka 'kpee! 'Waa 'siεle- mεε 'kedo- 'kpo
ba, 'bhε 'pegee 'waa mεε kedo- 'kpo ηgblo 'siεle-
'bhεε- 'waa mεε 'kedo- 'kpo tabhlele.

3 'Naa -o 'bhε 'pe zii' 'ka 'to 'yoo- pe zayi' 'dε,
'duj- 'mi 'a □pia 'ka ni 'elwale gban doo 'ka -za so
'mi ni 'egbεnle 'kee- kan -a -dan' ta. 'Ka 'sogbeya
-yoo' 'ε 'koo 'o ni, -asiikoo pe 'kedo- 'kpo 'laa so
-koo' 'plenjo- 'eke- ma; 'ali- yaa do ga 'kpee 'ke
'bhε 'bhε klε.

4 'Mi 'gbu 'kpale- -o 'ka 'yi 'egbεnle, 'mi so 'η
-baale' 'ka mu 'yi. 'N 'yoo- -yren mu 'la 'kpen 'yi

-ge bhe, 'duŋ- 'fuudɔle -o 'ŋ ta, 'bhɛɛ- 'ŋ zrukpaale -o 'kee- kan -a -dan' ta.

⁵ Wlan 'ɛ ni, -a 'san 'ŋ nule 'ɛ ma Masedwani -wa 'ɛ ta -ge, 'waa 'o 'yitrɛ- yrɛ sanɛ- 'gbu 'srɔwɔlɛ -lido'. -Woo' 'yrɛbatɛdɔ 'zi gbɛ 'ɛ 'kpen ma. Mɛɛ 'ke mu -o gwledan 'zi 'o ba, 'bhɛɛ- -gblaan -o 'o zru 'yi.

⁶ 'Duŋ- -Waanbhaa' 'la 'fuudɔ- mɛɛ 'la zan mu -gblɔzi' gale -o 'mu ta, Titi 'nulawoa, -e 'fuudwa- 'o ta.

⁷ Titi 'nule- do -kplɛn 'laa klɛlɛ 'fuudɔpɛ 'le 'o ta. 'Duŋ- -ya ꞑpia 'o ni dɔɔ 'kaa- ꞑkwan 'elrele gɔnɛ- 'la gbɛɛn- 'bhe 'fuudwa -a ta. 'Bhɛɛ- -ya ꞑpia 'o ni 'ezin- dɔɔ 'ŋ 'ye -lrɔ -o 'ka ma 'egbenɛle, 'bhe 'pegee -za mu 'la ꞑtian 'ŋ ma, 'mu 'ka wleyisriwoa, 'bhɛɛ- 'ka 'an -za -vavade. 'Bhɛla- -zayile 'mi a pɛ zrukpa' 'bhe -o 'egbenɛle.

⁸ 'Ali- 'mi 'lɛtrɛ 'la ꞑkpa' 'ka ni, 'ke 'bhe 'ka wleyisriwoa, 'bhe 'laa -zadɔwɛɛ dɔlɛ 'mi ma -titi. 'Bhɛɛ- 'duŋ-, 'an 'yelawoa 'bhii- -e 'ka wleyisriwoa 'waati sa, 'bhɛɛ- -zadɔwɛɛ -dwa 'mi ma 'tɛ.

⁹ 'Duŋ-, 'mi zrukpaale -o -zɔn. 'Ka 'ka wleyisrilawoa 'bhe 'laa -o 'ke 'mi zrukpaaza 'le. 'Duŋ- 'kaa- wleyisriwoza 'ɛ 'bhɔlawoa 'ka ba, 'bhɛɛ- 'ka 'ploola- 'ka 'joo 'yɔɔ- mu 'ɛ ma, 'bhe -za 'ɛ 'bhe -le 'mi zrukpaaza 'le -zɔn. 'Kaa- wleyisriwoza -benɔgwa 'ke -Waanbhaa' zru maza 'ɛ 'le; 'bhe -la ma -le 'o -za 'la ꞑkla 'ka ni, 'bhe 'laa klɛlɛ -za 'yɔɔ- 'le.

¹⁰ Wlan 'gbu 'ɛ ni, wleyisriwoza 'la da -Waanbhaa' ba, 'bhe -le 'a klɛ 'bhɛɛ- bhaaplɛn plo -za 'yɔɔ- ma, 'bhɛɛ- -ya 'joo 'ɛ mabɔɔ; 'bhe klegbeyɛ 'ɛ 'yi bhe, 'bhɛɛ- -e go -za 'yi. 'Bhe

wleyisriwoza -gloon 'e 'bhe 'laa -zadowee do mee ma. 'Dun-, 'drunyan 'yi wleyisriwoza 'e, 'bhe -le 'ke mee nipe 'pegee mee depe 'le -Waanbhaa' -yre 'yi, -amasroyi bhaaplen laa ploo -yaa' -za 'yoo- 'e ma.

11 'Yee- wleyisriwoza 'la da -Waanbhaa' ba -e -za mu 'la □kla 'ka zru mu 'e 'yi -ka 'mu -glin doo! -E 'ka □si 'e maboola -zon, 'bhe- 'ka -o -Waanbhaa' a -za 'e 'kun zii' 'elrele; -e -zadowee -dwa 'ka ma. -Za la 'ka zru ma; 'bhe- 'ka gbilaan -za 'yoo- klele -lee. 'N 'ye -lro -o 'ka ma, 'bhe- 'ka -o do 'zi 'egloole -Waanbhaa' a zi 'e ta. 'Bhe- 'ka takanle -o -za 'yoo- 'e 'krowo zayi'. 'Kaa -zronna zrongbeya 'e 'kpen 'yi 'bhii- 'ka kleza laa -yaa 'yee- -za 'e 'le.

12 'Mi 'letre 'la □kpa 'ka ni, 'naa klele mee 'la zan -za 'yoo- 'e □kla, 'bhe 'pegee 'yee- -za 'yoo- 'e □tian mee 'la zan ma, 'mu do -kplen 'kaama- 'Dun-, 'mi 'a □kpa 'ka ni, 'koko- 'o -za -o 'ka 'koo 'egbenele gone- 'la gbeen- -Waanbhaa' -yre 'yi, 'ka 'kpen 'bhe do.

13 'Bhela- -zayile, 'ka -za 'la □kla 'bhe 'fuudwa- 'o ta. 'Ka 'fuu la 'bhe -dwa 'o ta, 'bhe 'pegee 'ka fangan- 'la -dwa Titi ta, 'bhe- -a zrukpaale 'la -daa 'ka ba ye, 'bhe 'o moo a pe zrukpa 'e baan' □klaa -a ba.

14 'Ke 'mi 'gbu 'η 'wasowoa sa 'ka mu 'yi -a -yre ma, 'ka 'laa -yraladole 'η ma. 'O -jan 'la wo 'ka ni 'tanji wlan ma, 'bhe 'pegee 'woo 'waso sa 'la □woa 'ka mu 'yi Titi 'yre ma, 'bhe 'a -zronna 'bhii- 'zoo 'yaa- 'o zi 'bhe klelele.

15 -Ayile -zon, 'ka za 'sole- -o Titi ni 'egbenele; -amasroyi 'ke -ya 'kpeeledaan 'ka mi 'wojan- 'e

'klosikwan gɔnɛ- 'la gbɛɛn- 'bhɛ ma, 'bhɛ 'pegee
'kaa 'cieya- □kla 'ke 'ka -gasi -gbɛnɛ kpa a -lɛɛ
gɔnɛ- 'la gbɛɛn-, 'ka 'soniya 'ɛ baan' 'kla zii' -a ba
-a 'kpee.

¹⁶ 'Mi 'duŋ-, 'ŋ zrukpaale -o 'ezin- 'egbɛnɛle,
-amasrɔyi 'mi sɔ 'ŋ 'kpale- 'ka mu 'yi -za 'ɛ 'kpen
'yi.

-GOLI' 'KPAZA- 'EKE- TA ZERUZALEMU ZESU 'YI MU 'E NI

8

*Masedwani 'klɛn 'yi Zesu 'yi mu 'ɛ -waa' -goli'
'kpaza- 'eke- ta*

¹ 'Nj nɛɛnɛ- mu, -Waanbhaa' □lia Masedwani
'klɛn 'yi Zesu 'yi mu 'ɛ ma gɔnɛ- 'la gbɛɛn-, 'woo-
zan 'bhɛ -za 'ɛ 'wolɛ- 'ka ni.

² 'Trɛbhɔ -gbɛnɛ mu -yaa -o ta. 'Duŋ- zrukpaal'
'la 'yaa- -o -yi -daŋ' 'laa -yaa 'bhɛ ma. 'Ali- -waa'
'kɔɔflɛŋya 'ɛ 'yi, -o -dwa -a -la 'ke -o -goli' -bebe
kpa 'eke- ta, 'bhɛɛ- -o bhɔ Zeruzalemu Zesu 'yi
mu 'ɛ ba 'bhɛ 'le.

³ 'Mi 'gbu -o 'bhɛ 'srɛ 'le, 'bhɛɛ- 'ŋ sɔ -a pele dɔɔ
-o gbɛ -swa -goli' yɛkɛ- 'la 'srɔɔwole ta, -o 'bhɛɛ-
□naa. 'Ali- 'o yri -yaa goli' yɛkɛ- 'la ta -o -pinaa'
'bhɛ ta. Yaa klelɛ 'bhii- mɛɛ -le 'bhɛ □wlaa -o zi,
'duŋ- -o 'gbu -le 'bhɛ □naa -o 'gbu zru ma.

⁴ -Woo' matedwa -sromabɔlele 'o ni dɔɔ 'o -dwa
-a -la 'ke -o sɔ bhɔle -Waanbhaa' a mɛɛ 'wɛŋ mu
'la -woo Zeruzalemu 'mu ba.

⁵ -O -za 'la 'bhɛ □kla, 'bhɛ 'kaan- 'o mɔɔ -yri
-yaa -za yɛkɛ- 'la klele ta -o 'kɔɔ 'bhɛ ta: -woo
'gbu □naa 'elwale 'pe Mɛɛzan Zesu ni, 'bhɛɛ- -woo

'gbu □twa 'o mɔɔ 'kɔɔ 'ezin-, 'bhe -za 'ε 'kpen -daa
-Waanbhaa' zru maza 'ε 'bheε- ba.

Pɔlu a mεε -liawli' 'kɔɔ -glɔɔya' ba zayi'

⁶ 'Bhela- -zayile, 'o -sromabwa Titi ni dɔɔ -e ge
'ka ba ye, 'kooko- -e ye -lrele' 'la zisaan- 'ke -ya
pe 'ka ni 'ka -goli' 'kpa 'eke- ta, -e ge 'bhe ye 'ε zi
'kee- 'bhe 'leyan-.

⁷ 'Bhe ya 'ε 'yi, 'ka -o mɔkpen' 'lεε -za 'kpen
'yi: 'e pe 'kpaleya 'yi oo, -janwo' gbeya 'yi oo,
-zadɔleya 'yi oo, -za 'kpen -vavadεle 'yi oo; 'bheε-
'o -za sɔ 'ka ni 'egbεnεle. 'Bheε- 'duɲ-, -ka dɔ
'ezin- klen 'ke 'ka kle mɔkpen' 'lεε -za 'brεε -gloɔn
'lεε- klele 'yi.

⁸ 'Naa -a zi 'bhii- 'kaa kle kpanɲma. 'Duɲ- Zesu
'yi mu -vin mu 'ε -woo 'kɔɔpε- mu 'ε □naa gɔnε-
'la gbεen- blaale-, 'mi -o 'bheε- -jan 'ε 'wo zii' 'ka
ni dɔɲ. 'N 'bhe 'wo zii' win 'la ma, 'bhe -le dɔɔ
'ke 'ka mu sɔ a zɔnle- 'ka klegbeya 'ε ma 'bhii-
'kaa- pε 'sɔniya 'ε 'bhe -o 'ke wlan 'le.

⁹ -Amasɔyi -kɔɔa' Mεεzan Zesu Krisi 'bhe a
-lileya 'ε -zɔnna -kɔɔ' ni gɔnε- 'la gbεen-, 'ka
'gbu 'bhe dɔ. 'Tɔbhɔleya -yaa -a 'kɔɔ, 'bhe 'pegee
-e -yaa' pε 'kpen zan 'le lafle' 'yi, 'duɲ- 'ka mu
-zayi' -e -nwa -a 'gbu klele 'ke -yɛn ma mεε 'le
'trε ta -gε, 'bheε- -e -gaa, 'kooko- 'ka kle pεzan 'le
-Waanbhaa' -yɛε 'yi.

¹⁰ 'Bhe ya 'ε 'yi bhe, 'mi -o 'η 'gbu 'kpeejan- -la
wo zii' 'ka ni 'yee- -za 'ε ta; 'bheε- 'mi pe dɔɔ: 'Ka
-za 'la klele zisaan- lεεlii 'ε 'le, -ka ge 'bheε- -gloɔn
klele 'ε zi. 'Ka mu, 'ka laa klele -a □lwa kle mu
'te 'le, 'duɲ- -a kle -lɔɔ -dwa 'ka mu 'la ma 'elwale
'pe, 'bheε- 'kaa □kla.

¹¹ 'Ka 'yee- -za 'la zisaan- 'ka zru 'ε 'kpen 'le, -ka do klen 'ke 'kaa 'leyan- 'ka zru 'ε 'kpen 'le 'ezin-, 'ke 'bhe -benjole kle 'ka 'fuu so -za yeke- 'la klele ta 'bheε- 'le.

¹² -Amasroyi, 'kee- pe na 'e zru -lirele' 'le, 'bhe -le so -Waanbhaa' ni. 'Bheε- 'duj-, 'kee gbeswa-pe 'la 'nale- ta, 'bhe -le so -a ni 'ke 'bhe kan 'e gbe laa 'sole- pe 'la 'nale- ta a ni 'bhe ta.

¹³ 'Naa 'pele- doo 'ka 'ka 'gbu kle 'kooflenjan mu 'le 'ka 'bho zayi' mee -bheεke' mu ba. 'Mi -o -a zi 'bhii- 'kaa kle, 'koko- 'ka 'kpen 'koope- mu 'ε so 'eke- ni.

¹⁴ -Zon 'ka mu 'koo 'pale- -o, 'bheε- 'bhe 'sej -o 'ka ni 'ke 'ka bho 'kooflenjan mu ba. 'Bheε- yi 'la ta, 'ke pe 'kedo- 'kpo 'laa -o 'ka mu 'koo, 'bheε- 'ke 'woo- mu 'koo 'pale- -o, -o nu 'sole- bhole- 'ka mu ba. 'Ke 'bhe □kla, 'ka 'kpen nu klele do 'te.

¹⁵ 'Bhe kle 'bhii- -a yoondele -o -Waanbhaa' a 'Sewe 'ε 'yi gone- 'la gbeen- doo:

«Mee 'la zan 'bhe pe 'srε 'woola-, 'bhe a pe 'ε -vin
 'laa bole;
 'bheε- mee 'la zan 'bhe pe sa -woola, 'bhe 'koope-
 'ε yaa 'kaanle-.»

Titi 'pegee -a mado mu

¹⁶ 'Mi -Waanbhaa' 'pubo-, -amasroyi -e 'ka mu -vavade zruwlaa- Titi 'kpee 'bhii- 'mi 'ka mu -vavade gone- 'la gbeen- bhe.

¹⁷ 'O -jan 'la □woa -a ni, -e -dwa 'bhe □la. 'Bheε- droon', 'ka -za 'la -ya 'koo 'egloule bhe, -ya -dwa -a 'gbu 'kpee 'kaa -e gele- 'ka ba ye.

¹⁸ 'Woo- 'yee- Titi 'pegee 'o neene- 'bheεke do winbo 'zi 'ka ba ye. 'Bhe -koo' neene- 'ε 'bhe -o

Krisi a -Jan 'Nrале- 'ε 'wo zii' gōνε- 'la gbεεν-, Zesu 'yi mu 'ε 'kpen -o -a 'to wlan 'pe 'zi 'bhe ma.

19 'Bhe trala 'ezin-, Zesu 'yi mu -le mu 'ε 'kpen 'yee- 'o nεενε- 'ε makwan- 'kaa -e ge 'o zi 'bhe ye -lrele' 'ε wo 'taa 'ε ta. -E nu bhōε 'o ba 'o -goli' yεke- 'la 'srōwoa- 'bhe 'yiciεnlele. 'Woo- 'bhe ye 'lεε- 'wo zii' 'yee- Mεεzan -Waanbhaa' 'to 'bhō zayi'; 'bhe 'pegee 'wa zrōn 'zi 'bhe klegbeya 'ε ma 'bhii- 'woo- -a zi 'bhii- 'o 'bhō 'o nεενε- mu 'ε ba.

20 'Woo- 'bhe 'kpen kle 'zi 'bhe gbεεν- bhe, -amasrōyi 'waa -o -a zi 'bhii- -o -layre' -srōwo' 'o ta -za 'kedo- 'kpo 'yi 'yee- -goli' 'lεε 'kungbeya 'ε ma, -amasrōyi -goli' sa laa 'kele-.

21 -Amasrōyi 'woo- -za 'brεε -la kleyre -glin 'zi, 'waa -o 'bhe -glin 'zi Mεεzan -Waanbhaa' do -kplεn 'yre 'yi, 'duη- 'woo- 'bhe kleyre -glin 'zi 'ezin- bhaapleη mu -la -yre 'yi.

22 'Woo- 'o nεενε- yaga mi 'la 'kpa zii' -o ba; 'o 'bhe 'yreglinna 'ke 'o ye -gloōn 'ε 'kpen kpa -a ta, 'duη- -ya 'kpen □kla -a zru 'ε 'kpen 'le. 'Bhεε- 'saanige 'ezin-, -a zru 'ε 'kpen 'nale- -o -Waanbhaa' a ye 'ε 'bhεε- ni 'ke 'bhe kan 'elwale pe 'ε ta, -amasrōyi -a 'kpale- -o 'egbenele 'ka mu 'yi.

23 'Kee- □bwa Titi a pe 'ε ta, 'bhe -o 'η 'mado- mi 'pegee 'η yewoyōōn 'le 'ka mu ba. 'O nεενε- -vin mu 'la 'mu -o ge 'zi 'a zi, Zesu 'yi mu 'ε 'kpen -le 'mu 'winbwa-.

24 'Bhεla- -zayile, -kaa zrōn -o ni 'bhii- -o -za sō 'ka ni 'egbenele, 'kooko- Zesu 'yi mu 'la 'mu -o winbwa-, 'mu 'a 'yaango- 'bhii- 'zoo 'yaa- 'o zi 'ke 'woo baa 'ka 'yi.

9

Bhɔza Zeruzalemu Zesu 'yi mu 'ε ba

¹ 'Ka nu -goli' 'la 'kpale- 'eke- ta, 'bhεε- 'ka bhɔ Zeruzalemu Zesu 'yi mu 'ε ba 'bhε 'le, 'mi 'a □ya 'bhii- win laa -o 'bhε ma 'ke 'η 'sεwεδε 'ka ni 'bhε ba -zayi'.

² -Amasroyi 'ka 'yriwlale -o 'bhε -za 'ε klele ma gɔnε- 'la gbεen-, 'η 'bhε dɔ. 'Mi 'yaa- 'η -baa 'zi 'ka mu 'yi 'bhεε- -zayi' Masedwani mεε mu 'ε 'yρε ma 'ke 'an pe -o ni dɔɔ: «'Kee- san lεεlii, 'ka mu Akayi 'klεen 'yi Zesu 'yi mu 'ε, 'ka 'yriwlale -yaa 'ke 'ka bhɔ -Waanbhaa' a mεε 'wenj mu 'la -woo Zeruzalemu 'mu ba.» 'Ka 'bhε -za 'ε klele -vavadia gɔnε- 'la gbεen-, 'bhε zruwlaa- 'ezin- mεε -bebe 'kpee.

³ 'Bhεε- 'duη-, 'η 'yoo- -kɔɔ' nεεnε- mu 'la 'winbɔ- 'zi 'ka ta ye, 'kooko- 'η 'ka 'tɔlabhwa -o -yρε ma, 'bhε 'laa kle bhaama za 'le. 'Duη- -ka dɔ klen, 'kooko- 'ka 'yriwlale bo 'sani- -o nule plen- 'bhii- 'an □pia -o ni gɔnε- 'la gbεen-.

⁴ 'Ke 'bhε 'laa klele, 'ke -kɔɔ' nεεnε- Masedwani Zesu 'yi mu 'la □nwa 'η zi 'ka ba ye, 'bhεε- 'ke waa 'ka 'yriwlale yele, 'η 'yoo- -gblaan 'zi -za do -la -lεε dɔɔ 'o mɔɔ 'la 'kpale- -o 'ka 'yi, -yrala' nu dɔle 'o ma, 'bhεε- -e nu klele 'ka mu 'gbu ma -yrala' 'le 'ezin-.

⁵ 'Bhεla- -zayile, 'mi 'η 'kpeelɛdaan, 'bhεε- 'an □ya zi 'le 'ke 'η -sromabɔ 'η nεεnε- mu 'lεε- ni, 'bhεε- -o kan -sɔ 'η 'lεε 'ke -o ge 'ka ba ye; 'kooko- 'ka -goli' 'la 'naza- □pia, 'ka 'bhε -za 'ε 'yρεbago 'sani- 'η 'nule- plen- 'ka ba ye. 'Ke 'bhε □kla, -e nu klele 'bhii- 'kaa □naa 'ka zru 'ε 'kpen 'le, 'bhεε- 'ka 'laa 'nale- 'klin 'yi.

⁶ 'Bhɛɛ- -ka -za 'lɛɛ- 'bhɛ dɔ 'ka 'kpee dɔɔ: 'Ke mɛɛ 'la zan gba sa □kpaɔ, 'bhɛ zan nu pɛbhaa sa -la -srɔɔwɔlɛ. 'Ke mɛɛ 'la zan gba -gbɛɛ □kpaɔ, 'bhɛ zan nu pɛbhaa -bebe -la 'srɔɔwɔlɛ.

⁷ 'Ka 'kpen do do -gɔli' yɛkɛ- 'la 'nale- -dwa 'ka 'kpen do do 'kpee, -ka 'bhɛɛ- 'na. 'Ka 'laa 'nalɛ klin 'yi, 'bhɛ 'pegee kpaɲma. -Amasrɔyi mɛɛ 'la zan pɛ na 'bhɛ zrukpaale 'le, 'bhɛ zan -la -za sɔ -Waanbhaa' ni.

⁸ 'Ke 'ka pɛ -naa 'bhɛ gbɛɛn- bhɛ, 'bhɛ 'sɛɲ -o -Waanbhaa' ni 'kee- -za 'wlan -glɔɔn 'ɛ 'kpen klɛ 'ka ni, 'kooko- 'waati 'ɛ 'kpen ba 'ka maza -o pɛ 'oo pɛ 'la ma 'ka 'bhɛ 'srɔɔwo-, 'ke 'ka 'kɔɔ pa 'kɛle- 'ezin-, 'bhɛɛ- 'ka sɔ -za 'wlan -glɔɔn 'ɛ 'kpen klɛle-.

⁹ 'Bhii- -a yɔɔndɛle -o -Waanbhaa' a 'Sɛwɛ 'ɛ 'yi gɔnɛ- 'la gbɛɛn- dɔɔ:

«Mɛɛ 'la zan gbɛ ta -o taataa 'bhɛ pɛ na 'kɔɔflɛnzɔn mu -la ni, 'bhɛɛ- -ya pa -o ta.

'Bhɛɛ- -yaa' wlanya 'ɛ -dan' 'laa -o 'bhɛ ma -titi.»

¹⁰ -Waanbhaa' 'la gba 'kpa pɛbhɛ mu na gba 'kpa mi 'ɛ ni, 'bhɛ 'pegee 'ke -ya -lɛbɔ' pɛbhle na -a ni, 'yee- do 'kpɔ 'ɛ nu 'ka maza -o pɛ 'oo pɛ 'la ma 'bhɛ 'nale- 'ka ni, 'bhɛɛ- -e 'ka 'kɔɔ pa 'kɛle-, 'kooko- 'ke mɛɛ 'la zan mu mazadwa 'ka ma, 'mu sɔ pɛ -bebe 'srɔɔwɔle 'ka 'kɔɔ.

¹¹ -E nu -za 'wlan -glɔɔn 'ɛ 'kpen klɛle 'ka ni, 'kooko- 'ka sɔ mɛɛ -vin mu 'ɛ gbale- pɛ ba 'waati 'ɛ 'kpen ba. 'Ke 'o □nwa, 'bhɛɛ- 'ka -gɔli' 'la □kpaɔ 'eke- ta, 'ke 'o 'bhɛ 'lɛnaa- 'waati 'la ba, mɛɛ -bebe nu -Waanbhaa' 'pubɔlɛ, 'bhɛɛ- -wa 'tɔbhɔ- 'kaa- 'bhɔɲbapɛ 'ɛ -zayi'.

12 -Amasroyi 'ka nu -goli' 'la 'kpale- 'eke- ta, 'bhe 'laa nu klele -Waanbhaa' a mee 'wenj mu 'e maza -yanwope dron 'le; 'duj- 'bhe nu -a klele 'bhe- mee -bebe nu 'pubo- 'seri klele -Waanbhaa' ni.

13 'Kaa- 'bhonbape 'la 'o nu 'bhe 'lenale Zeruzalemu Zesu 'yi mu 'e ni, 'bhe nu a zronle mee mu ni 'bhii- 'ka bloule 'la -yoo -Waanbhaa' ma 'bhe -o 'ke wlan 'le. 'Bhe □nɔɔ Zesu 'yi mu 'e nu -Waanbhaa' 'tobhole 'bhe ma, 'bhe- -o nu a yele 'bhe ma 'bhii- 'kaa- pelawo zii' dɔɔ 'ka 'kpale- -o Krisi a -Jan 'Nrake- 'e 'yi, 'ka -o 'taawo zii' 'bhe -jan 'e ta. 'Ke 'bhe □kla, -o nu -Waanbhaa' 'tobhole, 'ka -o 'ka 'koope- mu 'la 'yicien- zii' 'ke 'ka bho 'woo- mu 'pegee -koo' neene- -vin mu 'e 'kpen ba 'bhe -zayi'.

14 -Waanbhaa' -lileya -gbene 'la -zronna 'ka ni, 'bhe -zayi', -o nu -o 'seriwole -Waanbhaa' ni 'kaa- -za ma 'ke -wa zron 'ka ni 'bhii- 'ka -za so -o ni.

15 'N neene- mu, -koo' -Waanbhaa' 'pubo- -a Gbe 'e 'nale- ma -koo' ni! -E 'koo- -gbaa -a Gbe 'la ba, waa so 'bhe 'kpale pe 'kedo- 'kpo ma.

PɔLU -O -A KLELE 'E ZESU A WINBɔWO MI 'LE 'BHE TA GWLEDAN 'ZI

10

-Waanbhaa' Pɔlu 'siila- ye 'la 'kaama-, -yoo 'bhe ta gwledan 'zi

1 'Mi Pɔlu 'gbu -le -za do -yrewo' zii' 'ka ma -ge, -yidɔɔya 'pegee wlanya 'la -woo Krisi 'yi 'mu -zayi'. -Wa pe 'η ma dɔɔ 'η 'yre 'laa so mee -yre ba 'ke 'η 'yoo- 'ka -din 'waati 'la ba, 'bhe- -wa pe 'η

ma 'ezin- dɔɔ mɛɛ -yre ma -glɔɔ, 'ke 'ŋ 'plɛŋgole -o 'ka ma 'waati 'la ba.

² 'Mi -o -sromabɔ 'zi 'ka ni dɔɔ 'ke 'ŋ -ja 'ka ba 'waati 'la ba, 'ka 'laa 'wlalɛ- 'ŋ zi 'bhɛɛ- 'ŋ -jan -glɔɔ wo 'ka ni. -Amasrɔyi mɛɛ 'la zan mu -o -a pe 'zi dɔɔ 'o mɔɔ -o 'taawo zii' bhaaplɛŋ 'kpeɛɛdan gbɛya zi, 'ŋ nu -jan -glɔɔ 'wolɛ- 'bhɛ zan mu 'ɛ ni.

³ Wlan 'ɛ ni, 'woo- 'ke bhaaplɛŋ mu 'le; 'bhɛɛ- 'duŋ-, 'waa -o gwledan 'zi 'bhii- bhaaplɛŋ mu a pe gwledan gbɛya 'ɛ gbɛɛn-.

⁴ -Amasrɔyi 'o gwledan gwledanpe mu 'la 'le, 'bhɛ mu laa -o 'ke bhaaplɛŋ mu a pe 'le. 'Bhɛ gwledanpe mu 'ɛ -glɔɔya' 'ɛ da -Waanbhaa' -la ba, 'bhɛɛ- -o sɔ -Setran' a fangan- 'ɛ 'pegee -yaa' -dawli' maza mu 'ɛ 'siele. 'Bhɛɛ- 'ezin- -o sɔ bhaaplɛŋ 'kpeɛɛdangbɛya -yɔɔ' mu 'ɛ 'siele.

⁵ 'Bhɛɛ- bhaaplɛŋ mu a magbaandele 'tole- magbaandele 'ke 'bhɛ a klɛ 'bhɛɛ- -o -vin mu laa -Waanbhaa' dɔ, 'o mɔɔ 'bhɛ 'kpen 'yisɛ-. 'Bhɛɛ- bhaaplɛŋ mu 'kpeɛjan- mu 'la -woo 'eyɔɔle -Waanbhaa' ma, 'o 'mu kun 'bhii- -kaso 'yi mu 'kungbɛya gbɛɛn-; 'bhɛɛ 'o 'mu mabɔɔ, 'kooko- bhaaplɛŋ sɔ dɔle- Kriɛ a -jan 'ɛ ɲla.

⁶ 'Bhɛɛ- 'ke 'wa ɲya 'bhii- 'ka -o 'taawo zii' 'o 'wojan- mu 'ɛ 'kpen ta 'elrele 'waati 'la ba, 'ke mɛɛ 'oo mɛɛ 'la zan 'o 'wojan- mu 'ɛ 'kafawoa; 'o nu 'bhɛ zan 'ɛ 'krowolɛ.

⁷ 'Kɛla 'bhɛ -o wlan 'le -ka 'bhɛ -glin doo! 'Ke mɛɛ do 'kpale- -o -a -yi 'bhii- -yoo 'ke Kriɛ a pe 'le, 'bhɛ zan 'a 'yaango- -a 'gbu 'kpee dɔɔ -yoo Kriɛ a pe 'le gɔŋɛ- 'la gbɛɛn-, 'o mɔɔ 'gbu -o 'ezin- Kriɛ a pe 'le 'bhɛɛ- gbɛɛn-.

⁸ -Amasrɔyi -Waanbhaa' fangan- 'la ɲnaa 'o ni

'ka mu ta, yaa 'bhe 'nale- 'o ni 'ka 'sie zayi', 'duŋ-e 'bhe ꞑnaa 'o ni 'kooko- 'o 'bho 'ka ba, 'bheε-'kaa- 'kpaleya 'ε baan' ge 'klalele -a ba. -E 'bhe fanŋan- 'la ꞑnaa 'o ni, 'ali- 'ke 'mi 'ŋ magbaandia sa 'bhe 'yi, 'bhe 'laa -yralado 'ŋ ma.

⁹ Yaa klele 'ka ni 'bhii- 'mi -a zi 'bhii- 'ŋ -gblaan 'kla 'ka 'yi 'ŋ 'letre mu 'la kpa 'ka ni 'mu 'le.

¹⁰ -Amasroyi mee 'ke mu -o -a pe 'zi doo 'mi Pɔlu -jan mu 'la kpa 'an 'letre mu 'ε 'yi 'mu -o 'egloole, 'bheε- 'mu la mee ma; 'bheε- 'duŋ- 'ke 'ŋ -yoo -o 'plen- 'waati 'la ba, fanŋan- 'laa -o 'ŋ 'gbu ta, 'bheε- 'an -janwo' gbeya 'ε 'bhe 'laa mee zru kun.

¹¹ 'Ke mee 'la zan mu -o 'bhe 'yansi jan mu 'ε wo zii' 'mi ma bhe, 'mu 'a 'yaango- doo 'o -janwo' gɔne- 'la gbɛen- 'waa- 'letre mu 'ε 'yi, 'waa nu 'bhe -janwo' gbeya 'ε maboolε 'ke 'o -ja 'waati 'la ba 'ka ba ye.

¹² Wlan 'ε ni, mee 'la zan mu -o 'gbu ye mee gblaan mu 'le, yaa so dole- 'o moo 'kpee 'ke 'wa pe 'o 'pegee 'bhe zan mu -o do, 'bheε- 'waa so 'o 'gbu danle- 'mu ma. Waa -o dan pe -bheεke' ma, 'ke yaa 'e go -o 'gbu ba; 'bhe -za 'la bhe 'bhe 'laa -o 'ke -zadokleya 'le εε?

¹³ 'Ke -yoo 'o moo a pe 'le, 'waa nu 'o 'gbu magbaandele, 'ke 'bhe kan -a -dan' 'ε ta. -Waanbhaa' ye yεke- 'la gbekpaa- 'o 'koo 'ke 'o -ja 'bhe 'wole- 'ε 'le 'fo 'ka ba ye, 'bhe -dan' -o yre 'la ꞑnoo, 'waa-pe 'ε -dan' -o 'bheε- ꞑnoo.

¹⁴ 'O gelawoa 'ka ba, 'waa 'kanle- 'o -dan' 'ε ta; -amasroyi 'o moo 'gbu -le -ja 'ka ba ye Krisi a -Jan 'Nrale- 'wole- 'ε 'le.

¹⁵ 'Bhe 'yi bhe, 'waa 'kanle- 'o -dan' 'ε ta, 'bheε-

'waa 'o 'gbu magbaandele mee -bhεeke' mu ye 'la
 □woa 'bhe 'yi. 'Bhεε- droon' 'o 'yri -o -a ta 'bhii-
 'kaa- 'kpaleya 'ε baan' nu 'klale- -a ba, 'bhεε- 'bhe
 klegbeya 'ε 'yi, 'waa- ye 'ε baan' nu -yidele, 'duŋ-
 'ke 'bhe 'laa kan -Waanbhaa' -dan' 'la 'kpalaa 'a
 ma 'bhe ta.

¹⁶ 'Bhe 'yi bhe 'te, 'o nu gele Kriŋi a -Jan 'Nrale-
 'ε 'wole- 'kleen mu 'la -woo 'ka -zanta' 'mu 'yi.
 'Bhεε- 'duŋ-, 'waa- zi 'bhii- 'woo 'gbu magbaandε
 mee -bhεeke' mu 'woye- 'ε 'yi.

¹⁷ 'Bhe -za 'ε ma jan yoondele -o -Waanbhaa'
 -a 'Sewe 'ε 'yi doo: «'Ke mee 'la zan -o 'bhe
 'gbu magbaandele, 'bhe zan 'bhe 'gbu magbaandε
 Meezan -Waanbhaa' -za 'la □kla 'bhεε- 'yi.»

¹⁸ Wlan 'ε ni, mee 'la zan 'a pe -a 'gbu ma doo
 -yoo 'ke mee wlan 'le, Meezan -Waanbhaa' laa do
 'bhe zan a -za □la; 'duŋ- 'yee- -Waanbhaa' mee 'la
 zan 'to wlan pe, -e do 'bhεε- zan a -za □la.

11

*Polu 'pegee bhla ma Zesu 'winbowo mu 'ε
 'plenza-.*

¹ 'E! 'Ke 'ka 'yaa so bi 'an -kwa 'ε sa 'yikunle!
 'Duŋ-, -kaa sa -yikun'!

² 'Ka -za 'sogbeya -yoo' 'ε 'koo 'η ni, -asiikoo
 'η 'yoo- zrwanwo 'zi 'ka ta, 'bhe zranwole 'ε da
 -Waanbhaa' -la ba. 'Ka -o 'bhii- -gblane 'la yaa
 'gwlaanza- 'yaango-, 'bhεε- 'ke 'mi 'η 'liiwli- □naa
 -a 'fluwoza ta 'gwlaan- do 'kpo -la 'koo, 'bhe
 'gwlaan- 'ε 'bhe -le 'ke Kriŋi 'le. 'Mi -o -a zi 'bhii-
 'ka kle 'wen.

3 'Dun- 'ka bloole 'la -yoo Krisi ma gɔnɛ- 'la gbɛɛn- bhe, 'mi -o -gblaan 'zi dɔɔ 'ke 'ka 'ka 'kpeejan- mu 'ɛ mabɔɔ, 'bhɛɛ- 'ka go 'yee- Krisi zi; 'bhii- -Setran' lii □wlaa mɛ 'ɛ 'yi gɔnɛ- 'la gbɛɛn-, 'bhɛɛ- -e ɛvu 'yinia□ -dawli' ma.

4 -Amasɔyi 'ke mɛɛ do □nwa 'ka ba, 'bhɛɛ- 'kee- Zesu 'bhɛɛke do -a -janwoa 'ka ni 'ke 'bhɛ gole -o 'o Zesu 'la 'bhɛ a -janwoa 'ka ni 'bhɛ ma, - 'kee- lii 'bhɛɛke a -janwoa 'ka ni 'ke 'bhɛ gole -o Lii 'Wɛŋ 'la 'ka 'bhɛ 'srɔɔwoa□ 'ka zru 'ɛ 'yi 'bhɛ ma; 'bhɛɛ- 'kee- -Jan 'Nrɛle- -bhɛɛke' do □woa 'ka ni 'ke 'bhɛ gole -o 'o 'kɛla 'bhɛ □woa 'ka ni 'bhɛ ma. -Mɛla ma 'bhɛɛ- 'bhɛ yrɛ do 'kpɔ 'ɛ □nɔɔ bhe 'ka dɔ blaale- 'mu □la ɛɛ?

5 Wlan 'gbu 'ɛ ni, 'ka 'bhɛ winbɔwo mu 'la kun 'bhii- 'winbɔwo mu 'tɔbhɔle, 'mi 'kpee ma waa kan 'mi ta -za 'kedo- 'kpɔ 'yi.

6 'Ali- 'ke 'naa -o 'ke -janwo' mi -gbɛnɛ 'le mɛɛ mu -yrɛ ta; 'bhɛɛ- 'dun- -zayaangoleya a pɛ zi 'ɛ ta, 'mi 'a 'ke dɔ 'bhɛ 'yi. 'O 'bhɛ -zrɔnna 'ka ni 'waati 'ɛ 'kpen ba, 'bhɛ 'pegee kɛgbɛya 'ɛ 'kpen 'yi.

7 'Mi -Waanbhaa' a -Jan 'Nrɛle- 'ɛ 'wolawoa 'ka ni 'ke 'naa pɛ 'kedo- 'kpɔ kun 'ka 'kɔɔ, 'bhɛɛ- 'mi 'ŋ 'gbu mazinalawoa, 'kooko- 'ŋ 'ka mu -lawɛn', taa- 'mi -za 'yɔɔ- -la □kla 'bhɛ 'le bhe ɛɛ?

8 'N 'yaa- yewo 'zi 'ka mu ni 'ka ba 'waati 'la ba, 'mi -dwa -a -la 'ke 'ŋ Zesu 'yi mu -lɛ -bhɛɛke' mu 'kɔɔpɛ- mu kun, 'kooko- 'ŋ sɔ bhɔle- 'ka mu ba. 'N -gɔli' □kwan -o 'kɔɔ, 'bhɛɛ- 'dun- 'naa yewole -o ni, 'fɔ 'ŋ yewoa- 'ka mu -la ni.

9 'Bhɛɛ- 'ŋ 'yaa- 'ka ba 'waati 'la ba, 'naa 'ŋ 'gbu 'kwe 'kpale- mɛɛ 'kedo- 'kpɔ 'wiin- 'ke 'ŋ maza

-yaa do -goli' ma. -Amasroyi, 'o neene- mu 'la -daa Masedwani 'mu -le 'η maza -yaa pe 'oo pe 'la ma 'mu □naa 'η ni. -Za 'kpen 'yi, 'naa 'tole- 'ke 'η kle 'ka ta 'kwe 'le, 'bhe- 'η nu 'bhe- klele 'tanii.

¹⁰ 'Bhe -le 'mi -baape' 'le. 'Dun- Kriisi a pe wlan 'ε ma, mee 'kedo- 'kpo 'laa nu 'bhe -baaza' 'ε 'saawole 'η 'koo Akayi 'kleen 'lee- 'kpen 'yi -ge.

¹¹ 'N 'bhe pe zii' win 'ε -dela ma ee? 'Bhe win le doo 'ka -za 'laa so 'mi ni ee? 'Dun- 'ka -za so 'η ni goone- 'la gbēen- -Waanbhaa' 'gbu 'bhe 'yaango-.

¹² 'N 'yoo- yewo 'zi 'ka ba goone- 'la gbēen-, 'η nu bole 'bhe- yewogbeya do 'kpo 'ε ta. 'Ke 'η 'bhe □kla, mee 'la zan mu -o 'a 'pe zii' -o 'gbu ma 'kaa -woo 'ke Zesu a 'winbowo mu 'le, 'bhe 'pegee 'ke -wa pe 'zi 'ezin- doo 'waa- pe yewogbeya 'ε 'pegee -waa' pe mu 'ε -woo do, 'bhe zan mu laa so 'mu 'gbu magbaandele.

¹³ 'Bhe mee -gloon mu 'ε -woo 'ke bhla ma Zesu a 'winbowo mu -la -le, -o woye 'ε 'bhe -o 'ke mee -yini' pe 'le. -Woo 'gbu kle 'bhii- Kriisi a winbowo mu.

¹⁴ 'Bhe 'laa -o 'ke 'kpeeleni maza 'le 'o 'yre 'yi, -amasroyi -Setran' 'a 'gbu maboo, 'bhe- -e kle 'bhii- -Waanbhaa' a -mleke' do 'la bhi -yrayra 'bhe gbēen-.

¹⁵ 'Bhe 'laa -o 'ke 'kpeeleni maza 'le 'ezin-, 'ke -yaa' pe yewone mu 'ε -woo maboo, 'bhe- -woo 'gbu kle -Waanbhaa' a yewone 'ledoole mu 'le. 'Dun- -o -leyanyre nu klele 'ke -Waanbhaa' a -kpan baalele -o ta -o kleza -yoo' mu 'ε ma.

Polu -yren mu 'la 'yikwan□ -yaa' Zesu a

'winbowoleya 'ε 'yi

16 'Mi -o bɔ 'zi 'ezin- 'bhe -jan do 'kpɔ 'ε ta 'ke 'an pe 'ka ni dɔɔ mεε 'kedo- 'kpɔ 'laa 'mi 'kunle- 'bhii- -kwanii' do. 'Dun- 'ke 'ka 'mi ɔkwan 'bhii- -kwanii' do, -ka dɔ -a -la 'ke 'ka 'ka 'tronkpa 'mi 'wojan- 'ε ɔla, 'kooko- 'mi sɔ 'η 'wasowole sa.

17 'Mi -o 'kela 'wo zii' 'ke 'mi 'η 'wasowo 'bhe 'laa -o da 'zi Mεεzan -Waanbhaa' ba; 'η 'yoo- -janwo' zii' 'bhii- -kwa -o 'η 'yi.

18 'Bheε- 'dun-, mεε -bebe mu -o 'wasowo zii' -waa' bhaaplɛɲya 'ε ma, 'mi sɔ 'η 'gbu 'wasowole 'ezin-.

19 'E! Ka mu 'la 'ka -o -zadɔ' mu 'le, 'ka dɔ -a -la 'ke 'ka -kwanii' mu kleza mu -yikun' εε!

20 Mεε 'la zan mu 'ka kle -waa' lu mu 'le, 'bheε- -o 'ka tabhle; 'bhe 'pegee -o 'ka 'kɔɔflɛɲ balaa' 'ka 'kɔɔpɛ- mu 'ε 'kpen 'silele; 'bheε- 'ke -woo 'ka mavεε; 'bhe 'pegee -o 'ka 'tron zɔn, 'ka 'bhe zan mu 'ε kleza mu 'ε 'yikun-.

21 -εε! 'Bhe kle 'waa- fangankleya -la ma, 'bheε- 'waa 'solɛ- 'bhe 'yansi za mu 'ε klele- εε? 'N bhe 'bhe -yraladɔ 'mi ma 'dɛ.

'Bheε- 'dun-, 'kee- sɔ dɔle- mεε 'ke 'kpee 'bheε- -ya baa -za 'ke 'yi; 'mi 'ezin- 'mi 'gbu sɔ 'bhe klele-; 'ali- 'ke 'η -janwoa 'bhii- -kwanii' do gbεεn-.

22 'Ke -wa ɔpia dɔɔ -woo 'ke Ebre mu 'le, 'mi 'dun- 'mi 'gbu -o Ebre mi 'le 'ezin-. 'Ke -wa ɔpia dɔɔ -woo 'ke Izraeli mu 'le, 'dun- 'mi 'gbu -o 'ezin- 'ke Izraeli mi 'le. 'Bheε- 'ke -wa ɔpia dɔɔ -woo 'ke Abraamu 'nranɛ- mu 'le, 'mi -o 'ezin- -a -nranɛ -kpɔsɔɔ 'ε do 'le.

23 'Ke -wa ɔpia dɔɔ -woo 'ke Krisi a yewonɛ mu 'le, 'mi -o 'ezin- -yaa' yewonɛ 'le, 'bheε- 'mi

kan -o 'kpen ta 'egboon gboonle'. 'N 'yoo- -janwo' zii' 'bhii- mεε 'la zan 'gbu ngblo laa -o 'bhe ta. 'Mi yewoa□ 'ke 'bhe kan -o 'kpen ta, -o 'mi □bwa -kaso 'yi 'ebebele 'ke 'bhe kan -o ta; -o 'mi tafia□ 'ebebele 'ke 'bhe kan -o ta. -A -lebwa sa 'ke 'η 'winbo- -a -yi 'waati 'ke ba.

²⁴ Zuufu mu 'ε -woo 'η □zwan gaan 'soo. 'Bhεε- 'duη-, 'η zon gbε do do 'ε 'yi, -woo 'η tafia□ gbanbhle yan mia do bhe vu ta 'srwayizie.

²⁵ Romε mu 'ε 'mu 'η tafia□ -gloon yaga, 'bhεε- mεε mu kpoti mu □paa 'η ma -gloon do 'η de zayi'. -Yitakon 'ε 'siela- 'η 'le -gloon yaga weyi- 'ε ta, 'bhεε- 'η -bi do 'pegee -yrekpaa' do □kla -yi 'ε ta.

²⁶ 'N -ja 'taa -bebe ta 'η gaan ma; 'duη- 'bhe □kla 'ebebele 'ke 'η 'winbo- -a -yi bi yue 'pale- mu 'ε ba, 'bhe 'pegee mεε de mu 'ε 'koo. 'Ali- -a -lebwa sa 'ke 'η 'winbo- -a -yi 'η 'gbu a 'kleen 'yi Zuufu mu 'ε 'pegee Zuufu kle mu 'ε 'koo. 'Kee- kpa -wa mu ta oo, 'kee- kpa -bonyi' yre mu noo- ta oo, 'kee- kpa weyi- ta oo, 'kee- kpa yre 'ε 'kpen ta, -a -lebwa sa 'ke 'η 'gbu winbo- -a -yi. 'Ali- 'o neene- mu 'la -wa pe -o 'gbu ma doo -woo 'ke Zesu 'yi mu 'le, 'bhεε- 'duη- 'ke waa -o 'bhe 'le wlan 'ε ma, -a -lebwa sa 'ke 'η 'winbo- -a -yi 'mu 'koo.

²⁷ 'Mi ye -gloo mu □woa, 'bhεε- 'η 'trebhwa□. 'Waati -bebe ba, yi laa 'solε- 'kpale 'η 'yre ta. 'Mi gbou 'pegee -yi 'mi -lro 'yikwan□. 'Bhεε- 'waati -bebe ba, 'mi 'sunwlaa- kpanma. 'Mi □bwa 'ebebele -niinii' 'yi 'η tafleη- 'le.

²⁸ 'Naa so -a 'kpen 'pele. 'Bhεε- 'ke 'bhe kpa 'kela bhe 'bhe ta, yi 'oo yi, Zesu 'yi mu -le mu 'ε 'kpen 'klankeba mu 'ε 'kpen 'ngami -o 'η ma.

²⁹ 'Ke Zesu 'yi mi do 'kpaleya fangan- -gwa -a

ta, 'bhe -za 'e la 'mi ma 'bhii- 'mi 'gbu -le 'ke 'bhe zan 'e 'le. 'Ke mee do -balaa' -za 'yoo- 'yi, 'bhe 'la 'η ma 'kee- kan a -dan' ta.

³⁰ 'Kee- 'kpa bi 'bhii- 'mi so 'η 'gbu magbaandele, 'mi 'yaa- nu 'η magbaandele 'mi 'gbu a fanjankleya 'e 'yi.

³¹ Meezan Zesu De -Waanbhaa' 'a 'yaango- 'bhii- 'naa bhla pe. Bhaa mɔkpen' 'a 'tɔbhɔ 'waati 'e 'kpen ba!

³² -Yrekpa' do, 'η 'yaa- 'waati 'la ba Damasi, 'bhe ɲɔɔ -bhlenjbe Aretasi a -janmatii 'e -ya ɲpia mee 'ke mu ni doɔ 'mu 'e 'yrekpa zi mu 'la wla -wa 'e 'kpee 'mu ba 'mi kun zayi'.

³³ Zesu 'yi mu 'e 'mu 'mi ɲbwa cie do 'yi, 'bheε- -o bhle -yrela bhe ma; 'ke -woo 'η 'kanle 'fegwle- 'e trala, 'bheε- -woo 'η zinaa' -a zanta'. 'Bhe klegbeyā 'e 'yi, 'η ɲswa -bhile' 'yee- -janmatii 'e 'koo.

12

Pɔlu pe 'la ɲya -yre zi yele do 'yi

¹ 'Ŋ so 'η 'gbu magbaandele εε? 'Duη- 'bhe 'laa -za 'ke 'yanwo- mee ma. 'Ŋ 'yoo- zan Meezan -Waanbhaa' -za mu 'la -zɔɔna 'η ni -yre zi yele 'yi 'mu ba janwolε.

² 'Mi Krisi 'yi mi do do, -za do ɲkla -a ni 'bhe lεε vu ta yizie -le -ge -zɔn. 'Bhe -za 'e 'bhe -le doɔ -Waanbhaa' 'a ɲsia, 'bheε- 'bhe -ja 'kele- 'bhe 'yaayre- 'e ɲɔɔ lafle' -dan' ma. 'Ke -ya ɲsia kpataakpa -a 'fle 'e 'yi oo, 'ke -ya ɲsia -Waanbhaa' a -yre zi yele -la -yi oo, 'naa 'bhe do. -Waanbhaa' do -kplen -le 'bhe do.

³ 'Mi 'a 'yaango- 'bhii- -Waanbhaa' -ja 'bhe 'gwlaan- 'e 'le 'fope lafle' -dan' ma. 'Dun- 'kee- -ja -a 'fle 'e 'bhεε- 'yi oo, 'ke yaa gele 'bhe 'yi oo, 'naa 'bhe do 'ke yaa 'e go -Waanbhaa' do -kplεn ba.

⁴ -Waanbhaa' 'a 'silawoa, 'bhεε- 'bhe -ja 'kele- 'bhe ba, 'kee- -jan 'ke mu male- 'bhe □noo: yaa do bhaaplεn 'kpee 'kee- 'bhe -jan mu 'ε wo bhaaplεn wli 'yi, 'bhεε- 'bhe 'sen 'laa -o bhaaplεn ni 'kee- 'bhe wo.

⁵ 'Mi so 'mi -baale' 'bhεε- mεε -gloon 'ε 'yi; 'dun- 'mi 'naa so 'η -baale' 'η 'gbu 'yi. 'Mi so 'η -baale' pε 'la 'yi 'bhe -le 'mi a pε fanḡankleya 'ε 'le.

⁶ 'Ke 'mi 'yaa- zi 'bhii- 'mi 'η 'gbu magbaandε, 'naa -yaa nu klele -kwanii' 'le, 'η 'yaa- nu wlan 'te -la pele. 'Dun- 'naa -a zi 'bhii- 'mi 'η 'gbu magbaandε, 'kooko- 'mi -o -za -gloon 'la kle 'zi, 'bhe 'pegee 'mi -o -jan -gloon 'la 'wo zii' mεε mu -yε ma, waa nu 'η 'yele- mεε gbilaan do 'le 'ke 'bhe kan 'mu ta.

⁷ 'Bhe mεε 'kpeeleni maza -gbεε mu 'la -e 'mu -zronna 'η ni -yε zi yele 'ε 'yi 'mu -zayi', 'bhe 'pegee, 'kooko- 'naa 'η 'gbu magbaandε 'mu 'yi, 'yee- -Waanbhaa' -yren 'yoo- do □kpa a 'η 'fle 'ε ta; 'bhe -o 'bhii- -Setran' a winbowo mi do 'la 'woye- -le 'ke -yrenkpalele 'η ta, 'kooko- 'naa so 'η 'gbu magbaandεle.

⁸ 'Mi -sromabwa Mεεzan -Waanbhaa' ni -gloon yaga doo -yoo 'η go 'bhe -yren 'ε 'yi; 'bhεε- -yaa dole -a □la.

⁹ Droon' -ya □pia 'η ni doo: «'N lilawo zii' 'e ma, 'bhe 'e 'yibho-, -amasroyi 'ke fanḡan- 'laa -o 'e ta 'waati 'la ba, 'mi a pε -glooya' 'ε zron bhla

-le 'bhεε- 'le.»

'Bhela- -zayile, -e sɔ 'mi ni 'ke 'mi 'η 'gbu baa 'η 'gbu a fangankleya 'ε 'yi, 'kooko- Kriɔ a -glɔɔya' 'ε 'bhε bo 'η ta.

¹⁰ 'Bhela- -zayile, 'η zrukpaale -o 'ke fangan- 'laa -o 'η ta oo, 'ke -woo 'η -zwanwoa oo, 'ke -za -glɔɔ -o 'η ta oo, 'ke -o -yɛnkpaɔ 'η ta oo, 'bhεε- 'ke -o 'trɛbhɔ ɔkpaɔ 'η ta oo, 'mi 'a 'yaango- 'bhii- 'η 'mu 'kpen 'yikun zii' Kriɔ -la -zayi'. -Amasɔyi 'ke fangan- 'laa -o 'η ta 'waati 'la ba, Kriɔ 'bhε a pɛ -glɔɔya' 'ε wla 'η 'yi, 'bhεε- 'waati 'ε ba, 'bhεε- 'η dɔ 'egloole.

Pɔlu 'laa pɛ 'kedo- 'kpɔ 'kunε- Korɛnti Zesu 'yi mu 'ε 'kɔɔ

¹¹ 'Mi -o -janwo' zii' 'bhii- -kwani' do gbɛɛn-! 'Duŋ- 'bhε -daa 'ka mu 'gbu -la ba. 'Ka mu 'gbu -le -yaa sɔ 'mi 'tɔ wlan pele- mɛɛ mu -yɛ ma. 'Ali- 'ke 'naa -o 'ke pɛ 'kedo- 'kpɔ 'le 'ka 'yɛ 'yi, 'ka -o 'kaa -winbɔwo mu 'tɔbhɔle mu 'la -za 'kun zii' 'egloole, 'mu mabhaa laa bhɔ 'mi ta -za 'kedo- 'kpɔ 'yi.

¹² 'N 'yaa- 'ka ba ye 'waati 'la ba, 'ka 'η zrubakpaagbeyɔ -gbɛɛ 'ε ɔya. 'Ka -Waanbhaa' a -glɔɔya' 'ε 'tɔɔmasie mu 'ε -glɔɔn 'ε 'kpen ɔya, 'bhε 'pegee 'kpeeleni maza -gbɛɛ mu 'pegee 'sole- maza mu. 'Bhε kleza mu 'la bhe, 'mu -le 'a zɔn 'bhii- 'mi -o 'ke Zesu a 'winbɔwo mi 'le.

¹³ 'Bhε ya 'ε 'yi, 'mi -mɛ pɛ -za 'wlan -la ɔkla -Waanbhaa' a mɛɛ -vin mu 'ε ni, 'bhεε- 'naa 'bhε 'yansi za klele 'ka mu ni εɛ? 'Ke yaa 'e go 'naa klelawole 'ka ta 'kwe 'le 'bhε ba. 'Ke -yoo 'bhε 'le, 'ka 'zoole-, 'η ηgblo -o 'ka gaan -la 'bhε ma.

14 'Mi -o zan gele 'an 'taa yaga mi 'la ta 'ka ba ye bhe, 'naa nu 'η 'gbu 'lebo- 'kwe 'kpaλε- 'ka 'wiιη-. 'Naa -o 'ka 'koope- mu 'ε zi, 'duη- 'ka mu 'gbu -la -za -o 'η ma. Wlan 'ε ni, -ne 'fientronne mu 'laa -goli' glin 'bhεε- -woo yape mu 'ε 'lebo-; 'duη- -o yape mu -le -goli' glin 'bhεε- 'mu -o -lebo' 'bhε 'le.

15 'Ke -yoo 'mi a pe 'le, 'η zru -o 'η 'koope- 'tole- 'η 'koope- nale ma -o ni, 'ke 'mi 'gbu kpa 'bhε ta. -Ayile, 'ke 'ka mu -za so 'mi ni 'egloole 'bhε gbεen-bhe, 'bhε 'laa so -a klele- 'bhεε- 'mi -za so 'ka mu ni 'ezin- εε?

16 'Ka 'gbu 'a 'yaango- 'bhii- 'naa 'η 'gbu 'lebo- 'kwe 'ε dole mee 'kedo- 'kpo 'wiιη-. 'Duη- -doke' 'ka 'pleη- mee 'ke mu nu -a pele doo: «Polu bakanle laa -o! -Yaa' -dawliya 'ε ma, -yoo' 'koope- mu 'ε □bhla.»

17 'Mi mee 'la zan mu winbwa- 'ka ba ye, taa- 'mu -dawli' □kpaα 'ka gbε ta, 'bhεε- 'mu 'ka tabhla- εε?

18 'Mi -sromabwa Titi ni doo 'bhε ge 'pwe- 'ka ta ye, 'bhε 'pegee 'o nεεε- 'la 'ka 'bhε do bhe. Taa- Titi -dawli' □kpaα 'ka gbε ta 'bhεε- -e 'ka 'koope mu 'ε □bhla εε? 'O moo 'pegee Titi 'kpeejan- mu -o do; 'bhεε- 'o 'kpen -o 'taawo zii' zi do 'kpo -la ta.

Polu blina- yien -o Korenti Zesu 'yi mu 'ε ba zayi'

19 'Ka □mwa gban 'sii -a pele ma 'ka 'gbu 'kpee doo 'o moo 'zoo 'na yre -la -glin 'zi 'o 'gbu ni 'ka 'yre ta; 'waa -o 'bhε kle 'zi. 'Woo -janwo' zii' -Waanbhaa' -yre ma 'o moo 'pegee Kriisi a 'kpaledomaya 'ε 'yi. 'N 'yienii mu, 'woo-

'bhe 'kpen 'pe zii' 'ka ni 'kooko- 'kaa- 'kpaleya 'e -Waanbhaa' 'yi 'bhe baan' kla 'bhe ba.

²⁰ Yi'en -o 'kan zii' 'mi 'kpee dɔɔ 'ke 'η -ja 'ka ba ye, -dɔke' 'naa nu bhɔle 'ka ta klegbeya 'la 'mi -o -a zi 'bhii- 'ka kle 'bhe gbɛɛn- 'bhe 'yi oo, 'bhɛɛ- 'ka mu laa nu 'mi 'yele- yegbeya 'la 'kaa- zi 'bhii- 'ka 'mi 'ye 'bhe 'yi 'sii oo. Yi'en 'la 'bhe -o 'kan zii' 'η 'kpee 'bhe win -le dɔɔ, 'naa -o -a zi 'bhii- 'η 'bhɔ 'ka ta 'ke sra mu -o 'ka 'plen-, 'bhe 'pegee zranwo maza mu, 'bhɛɛ- wiya plaza mu, 'bhe 'pegee zaabɔ za mu, 'bhɛɛ- 'eke- 'tɔpele 'pegee 'eke- 'tɔsiele, 'bhɛɛ- 'gbugblaanya 'pegee -za 'yaanmiwole mu.

²¹ Yi'en -o 'kan zii' 'η 'kpee 'ezin- dɔɔ 'ke 'η -ja 'ka ba ye, -Waanbhaa' laa nu -yraladɔle 'η ma 'ka 'yre ma. Mɛɛ -bebe 'la -za 'yɔɔ- □kla -sɔ, 'bhɛɛ- -zadɔwɛɛ 'laa dɔle 'mu ma, 'bhɛɛ- -o bole -o -za 'yɔɔ- klele ma 'bhii- -o -yaa kle gɔnɛ- 'la gbɛɛn- 'elwale -sɔ. Waa 'ploole -waa' 'trinɔɔ- maza mu 'pegee -waa' -yanbhɔɔya dɛza, 'bhɛɛ- waa -za 'yɔɔ- kle 'flen mu 'la 'yaa- -o ma 'elwale -sɔ 'mu ma; 'kee 'η □wlaa 'ka ba ye 'η nu wisile 'ebebele 'ka -bebe 'taawogbeya mu 'ε -zayi'.

13

Pɔlu a -danma' -liawli'

¹ 'N 'yoo- zan 'an 'taa yaga mi -la 'wole- 'ka ba 'taaleɛyi. 'Bhii- -a pele -o -Waanbhaa' a 'Sɛwɛ 'ε 'yi gɔnɛ- 'la gbɛɛn- dɔɔ: «'Ke 'ka -o -za 'oo -za 'la 'kitikanle, -ka mɛɛ ple, mɛɛ yaga kle 'ka 'srɛ 'le 'bhe -za 'ε ma.»

² 'N ge gbɛ ple mi 'ε ma 'ka ba, mɛɛ 'la zan mu -za 'yɔɔ- □kla 'elwale -sɔ 'η -janwoa 'mu ni 'bhe

'pegee mεε -vin mu 'ε 'kpen ni. 'Ali- 'ke 'naa -o 'ka ba ye -zɔn, 'η 'bhε zan mu 'ε 'kpeelεkan zii' dɔɔ, 'ke 'η ge gbε drεεwoa- 'ka ba 'ezin- 'waati 'la ba, 'woo- mεε 'la zan -za 'yɔɔ- □kla, 'naa nu 'mu 'pegee mεε 'kedo- 'kpɔ maplaale.

³ 'Kaa- zi 'bhii- 'kaa dɔ 'bhii- Krisi -le -jan 'kpa zii' 'mi 'lii; -ka 'ka zrukpaala, 'ka nu 'bhε dɔle. Krisi 'laa -o fanɣan- kle zan 'le 'ka ba ye; 'bhεε- drɔɔn' -ya -glɔɔya' 'ε zrɔn 'zi 'ka 'plen- ye.

⁴ Wlan 'gbu 'ε ni, -wa -gbaanna -yrigbεεle 'ε ta, -ya 'gbu klelawoa 'bhii- fanɣan- kle zan do 'bhεε- 'yi. 'Duɲ- -e -bwela gale ba, 'bhεε- -ya -yrε ma -zɔn -Waanbhaa' a -glɔɔya' -la ma. 'O mu 'ezin-, 'o 'pegee 'yee- a 'kpaledomaya 'ε 'yi, fanɣan- 'laa -o 'o ta. 'Bhεε- 'duɲ-, 'o nu bole 'o 'yrε ma -Waanbhaa' a -glɔɔya' 'bhεε- 'srɔyi. 'Ka nu 'bhεε- -glɔɔya' 'ε 'yele- 'o taawogbeya 'ε ma 'ka ba ye.

⁵ -Ka 'ka 'gbu zrubaglin doo, 'kooko- 'kaa 'yaango- 'ke 'ka -o 'kpaleya zi kplankplan 'gbu 'ε ta. -Ka 'ka 'gbu zrubaglin kplankplan doo. 'Ka nu a 'yele- 'bhii- Zesu Krisi -o 'ka 'yi. 'Fɔke 'ka 'ka 'gbu zrubaglinna, 'bhεε- 'kaa □ya 'bhε ma 'bhii- 'ka -baliwoa 'ka 'kpale- ma -a -yi.

⁶ 'Bhεε- 'duɲ-, 'mi 'kpale- -o -a -yi 'bhii- 'ka mu 'gbu nu -a dɔle 'bhii- 'o mɔɔ -bali 'laa 'wolε- 'o 'kpale- ma -a -yi.

⁷ 'Duɲ- 'o -sromabɔ -Waanbhaa' ni dɔɔ -e bhɔ 'ka ba 'bhεε- 'ka 'laa -za 'yɔɔ- do 'kpɔ kle. 'Waa- zi 'bhii- 'wa zrɔn 'ka ni 'bhii- 'o sɔ -za klele-. 'Duɲ- 'woo- -a zi 'bhii- 'o 'ka 'ye -za 'wlan kle yrε nɔɔ; 'ali- 'ke 'o mɔɔ -baliwoa 'bhε klele ma.

⁸ Wlan 'ε ni, 'waa sɔ -za 'kedo- 'kpɔ klele- 'ke

'bhe -Waanbhaa' a pe wlan 'e 'lega-. 'O so -za 'la klele- 'bhe -le 'ke -Waanbhaa' a wlan 'e baan' ge zi -lee.

⁹ 'Ali- 'ke fangan- 'laa -o 'o ta, 'bheε- 'ke fangan- -o 'ka mu ta, 'bhe 'o zrukpalaa. 'Duη- 'woo 'seriwo -Waanbhaa' ni 'kaa- -za ma 'kela 'yi, 'bhe -le dɔɔ 'kee- bhɔ 'ka ba 'ke 'ka 'kpaleya 'e baan' kla -a ba, 'bheε- -a -lepa'.

¹⁰ 'Bhela- -zayile, 'η 'plengole -o 'ka ma 'waati 'la ba 'η 'letrε 'lee- 'kpa zii' 'ka ni, 'kooko- 'ke 'η -ja 'ka ba 'waati 'la ba ye, 'naa -jan -gloɔ wo 'ka ni, Mεεzan Krisi gblaanya 'la □naa 'η ni 'ka mu ta 'bhe ma. Yaa 'bhe gblaanya 'e 'nale- 'η ni 'ka 'sie zayi', 'duη- -e 'bhe □naa 'η ni 'kooko- 'η 'bhɔ 'ka ba 'bheε- 'kaa- 'kpaleya 'e baan' kla -a ba.

Pɔlu 'srawoyre

¹¹ 'N nεεε- mu, 'kela 'bhe -o 'an -jan 'leyanyre 'le, 'bhe -le dɔɔ -kɔɔ' -o bhe oo, 'ka zrukpaale kle! -Za 'la 'bhe so 'kaa- 'kpaleya 'e baan' klale -a ba, 'bheε- -ya -lepa', -ka 'bheε- kleyre -glin. -Ka zruwla 'eke- 'kpee 'ke 'ka fangandɔ 'eke- ta; 'ka 'kpale- kle do ma; -ka bo 'eke- 'yi 'edɔɔle. 'Ke 'ka 'bhe □kla, 'bheε- -Waanbhaa' 'la mεε -za so -a ni, 'bhe 'pegee -e yilabla na mεε ni, 'bhe nu klele 'ka ba.

¹² -Ka 'eke- 'pubɔ- 'ke 'ka 'eke- -tuubɔ' 'bhii- nεεε- ma do mu. -Waanbhaa' a mεε 'wenj mu 'la 'kpen -o -ge, 'mu 'ka 'pubwa-.

¹³ Bhaa Mεεzan Zesu Krisi -li 'ka ma, 'bheε- bhaa -Waanbhaa' -yaa' 'soniya 'e 'wla 'ka zru mu 'e 'yi. 'Bheε- bhaa 'ka 'kpen bo Lii 'Wenj 'e -yaa' 'kpaledomaya 'e 'yi!

Mwan
The New Testament in the Mwan language of Côte
d'Ivoire

copyright © 2006 Wycliffe Bible Translators, Inc.

Language: Mwan

Contributor: Wycliffe Bible Translators, Inc.

All rights reserved.

2025-05-14

PDF generated using Haiola and XeLaTeX on 14 May 2025 from source
files dated 14 May 2025

1220066e-ed9e-5c66-9c3b-435a6575b8da